

Inatsisissatut siunnersuummut nassuiaatit

Nassuiaatit nalinginnaasut

1. Inatsisissatut siunnersuummut tunuliaqutaasut

Naalackersuisut inatsisaat kommunit aqunneqarnerat pillugu inatsit maanna atuuttoq 2008-imi akuersissutigineqarpoq. Inatsisip siornatigut inatsisaasimasup 1994-imeersup taarserpaa kingusinnerusukkut Inatsisartut inatsisaannik nr. 6-imi 12. juni 1995-imeersumik allanngortinneqartumik, (Nakkutilliisoqarfik), Inatsisartut inatsisaat nr. 8, 14. november 2004 (Aningaasanut ataatsimiititaliap annertunerusumik pisinnaatitaalernerat) aamma Inatsisartut inatsisaat nr. 19, 20. november 2006 (Oqarasuaatikku ataatsimiittarnerit).

2009-mi kommunit kattussuunnerata kingorna kommunit aaqqissugaanerata annertuumik allannguuteqarput.

Kommunit nutaat pilersinneqarneratigut kommunit aningaasaqarnerata aqunneqarnera paasiuminaannerulersissimavaa siornatigut kommunit 18-usunut naleqqiullugu aamma peqatigisaanik ilaatigut IT-mik ineriartortitsineq nassataqarpoq kommunini missingersuutit sukumiinerusut aamma eqqornerusut suliarineqarnissaannut periarfissaqalernerata. Kommunit tungaanniit aamma kissaatigineqarpoq kommunit aningaasaqarneranik aqutsinermi maleruagassat ullutsinnut naleqqussarlugit nutarterneqarnissaat.

Ullumikkut kommunit ukiumut 3 mia. kr.-nit sinnerlugit aningaasanik kaaviiartitaqartarput, taamaalillutillu nunatsinni pisortat aningaasanik atuineranni atukkat tamarmiusut ilaannik annertuumik atuisuullutik. Taamaattumik pisariaqartinneqarpoq kommunit aningaasanik atuinerata naalackersuinikkut aamma allaffissornikkut qanimut nakkutigineqarnissaa.

Taamaattumik Naalackersuisut upernaq 2010-mi missingersuusiortarnek, aningaasanik tigorianaateqarnek, naatsorsuutit, kukkunersiuisoqarnek kiisalu karseqarnek naatsorsuuseriveqarnerlu pillugit nalunaarut allanngortinneqassasoq aalajangiuppaat. Allannguutini immikkut pineqartut tassaapput immikkoortut marluk nutaat, ilaatigut kommunit atoriaannarnik aningaasanik peqartarnissaanut piumasaqaatip erseqqissarneqarnera, ilaatigut aamma aningaasaqarnermut aqutsinermut kapitali nutaaq. Aningaasanik atoriaannarnik 5 %-inik uninngasuuteqartarnissamik piumasaqaat attatiinnarneqarpoq,

piumasaqaammillu ilaneqarluni, kommunit tamatigut pisussaaffinnut ingerlaavartunut akiliisinnaassuseqassasut.

Aammattaaq kommunit inuussutissarsiutinut aningaasaliissutigisartagaat, qularnaveeqqusiuttagaat, tapiissutigisartagaat il.il. pillugit Namminersornerullutik Oqartussat nalunaarutaat nr. 6, 7. april 2004-meersoq atorunnaarsinneqarpoq.

Inatsisissap matuma siunnersuutigineratigut siunnersuutigineqarpoq kommunit pillugit malittaarisassat allanngortinneqarnissaat, ukiuni kingullerni marlunni kommunini aaqqissuussinerit aqunneqarneranni misilittagaalersimasut tunngavigalugit. Allanngortiterinermi ilaatigut kommunit kissaataat tunngavigineqarput aamma kommunit Naalakkersuisullu akornanni inatsisissap suliarineqarnerani suleqatigiilluartoqarpoq.

Borgmesterinik borgmesterillu tulliinik kiisalu kommunalbestyrelsinut nunaqarfinnilu aqutsisunut ilaasortanik il.il. akissarsiaqartitsineq pillugu nalunaarut taamatutaaq ukiup naannginnerani Naalakkersuisut naleqqussarniarpaat, taamaalilluni nunaqarfinni aqutsisunut ilaasortat nunaqarfinni aqutsisunut siulittaasutut atuuttussanngorlugit peqquneqartut akissarsiaqartinneqartalerlutik.

Naalakkersuisut kissaatigaat aaqqissuusseqqinnerup kingorna inatsisissatut siunnersuut aqqutigalugu isumannaarneqassasoq ataatsimoortumik ullutsinnut naleqqussakkamik inatsiseqalernissaa, kommunini aamma Namminersorlutik Oqartussani ulluinnarni sulinerimi sakkutut atorneqarsinnaasumik.

Namminersorluni Oqartussaanerup atuutilernerata nassataanik Inatsisartut inatsisaani matumani danskisut taaguutit tamarmik allanngortinneqarput taaguut “Landstinget” allanngortinneqarluni “Inatsisartut”-nut. “Landsstyret” allanngortinneqarpoq “Naalakkersuisut”-nut.

Naalakkersuisut nalilerpaat allannguutaasut tunngavigalugit kommunit aqunneqarneranni malittarisassat pissutsinut ullumikkut atugaasunut naleqquttuusut kommunillu aqunneqarnerannut pisariaqartinneqartunut naleqqullutik.

2. Inatsisissatut siunnersuutip imarisai

2.1 Aalajangersakkat nalinginnaasut

Kommunit aqunneqarnerat pillugu aalajangersakkat nalinginnaasut kapitalimi matumani aalajangersarneqarput. Aalajangersakkat maanna aalajangersakkanut atuuttunut naapertuuttuupput. Kommunini suliaasaqarfiit aaqqissuuteqqinneqarnerat pillugu inatsisartut inatsisaata atortussanngortinneqarnerata kingunerisaanik tulluarsaalluni naqqiissuteqartoqartarnissaa siunnersuutigineqarpoq.

2.2 Kommunalbestyrelsi

Kommunini ataasiakkaani kommunalbestyrelsimi ilaasortat amerlassusiat aammalu kommunalbestyrelsit inissitertarnerat kapitalimi uani aalajangersarneqassasut siunnersuutigineqarpoq.

Aammattaaq kommunalbestyrelsit sulinerat aalajangersarneqarpoq. Akissarsiaqartitsinernut aalajangersakkat immikkut kapitalimut nutaamut (kapitali 8) siunnersuummi nuunneqarput. Tassunga tunngatillugu immikkoortoq "3.8 Akissarsiat" takuuk.

Kommunerujussuarni kommunalbestyrelsit ammanerusumik sulinerisa ingerlanneqassasut naalackersuisut pingaartippaat, taamaattumillu siunnersuutigalugu kommunalbestyrelsini ilaasortat ataasiakkaat kommunalbestyrelsimi suliaqarnermi allagaatinik suliamut attuumassuteqartut annertunerusumik misissorsinnaangorlugit. Kiisalu Naalackersuisut siunnersuutigaat piffissaliussanik aalajangersaasoqassasoq ullormut oqaluuserisassat aammalu kommunalbestyrelsip ataatsimiinnerini allagaatitigut atortussat kommunalbestyrelsimi ilaasortanut nassiunneqareertarnissaannut atatillugu.

2.3 Borgmesterip aamma borgmesterip tulliata atuunnerat

Kommunimi ingerlatsinerup ersarinnerulernissaanik Naalackersuisut kissaateqarnerisa kingunerisaanik suliani kinguartinneqarsinnaanngitsuni imaluunniit apeqquserneqarsinnaanngitsuni aalajangiisoqartillugu borgmesterip kommunalbestyrelsimik aalajangiinerup kingornagut ilisimatitsisarnissaanik aalajangersagaqalissasoq Naalackersuisut siunnersuutigaat.

Borgmesteri pillugu kapitalimi aalajangersakkat sinneri siunnersuutigineqarpoq tulluarsaalluni naapertuussarneqassasut kommunini suliassaqarfiit aaqqissuuteqqinneqarnerat pillugu Inatsisartut inatsisaata akuersissutigineqarnerata kinguneranik, aammalu inatsisiliornermi paasinarnerusumik aammalu atuaruminarnerusumik anguniagaqarneq aallaavigalugu.

2.4 Ataatsimiititaliat, isumalioqatigiissitat ilaalu ilanngullugit

Naalackersuisut § 31-imi siunnersuutigaat, kommunalbestyrelsit periarfissinneqassasut kommunalbestyrelsinut ilaasortaanningsunik toqqaasinnaasut kommunalbestyrelsi sinnerlugu suliaqarsinnaasunik. Aalajangersakkap kommunalbestyrelsi periarfississavaa inunnik immikkut ittunik ilisimasalinnik toqqaasinnaangorlugit kommunalbestyrelsi sinnerlugu suliaqarsinnaasunik kommunalbestyrelsimit naleqquttutut isigineqarpata.

Nutaamik § 33-imik ilanngussineq inatsimmut maannamut atuuttumut naqqiutaavoq, aalajangersagaq kukkunikkut inatsimmiit peerneqarsimammat. Aalajangersagaq kommuninit ulluinnarni atorineqartarpoq.

2.5 Kommuni aningaasaqarnikkut ingerlatsinera

Kapitalimik suliarinnineq aaqqiinertalimmik ingerlateqqinneqassasoq siunnersuutigineqarpoq soorlu siusinnerusukkut oqaatigineqartoq.

2.6 Nunaqarfinni aqutsisut

§ 51, imm. 3 aamma § 56, imm. 1-mut allannguutissat eqqaassanngikkaanni aalajangersakkat maannamut atuuttut allanngunngillat inatsisilli normulersorneqarnera allanngorluni.

2.7 Nakkutilliineq

Kapitalip aalajangersakkat maannamut atuuttut assigaat inatsisilli normulersorneqarnerata iluarsinneri tunngavigalugit allanngorluni.

2.8 Akissarsiat

Inatsisip normulersornerata allanngornera eqqaassanngikkaanni aalajangersakkat maannamut atuuttut allanngunngillat.

2.9 Pineqaatissiisarneq aamma taarsiissuteqartitsisarneq

Inatsisip normulersornerata allanngornera eqqaassanngikkaanni aalajangersakkat maannamut atuuttut allanngunngillat.

2.10 Atortuulersitsineq

Inatsisissamut siunnersuut 1. januar 2011 atortuulersinneqassasoq siunnersuutigineqarpoq.

3. Pisortanut aningaasaqarnikkut allaffissornikkullu kingunerisassai

Naatsorsuutigineqarpoq kommunit ikinnerulernerisa kingunerissagaa siunissami periarfissaqalersoq ingerlatsinermi naammassisaqarluarnerusoqartalenera, taamalu suliat naammassineqartarnerini pitsaassutsip qaffasinnerusup anguneqarsinnaanera periarfissaqarfiulerluni.

Kommunini ingerlatsiviit anginerusut Namminersorlutik Oqartussaniit sulianik nussuinissaq piareersassavaat. Naalakkersuisut naatsorsuutigaat Namminersorlutik Oqartussaniit

kommuninut ingerlatsinermi sulianik nussuinikkut innuttaasunut sulianik naammassinnittarneq qaninnerulissasoq aammalu marloqiusamik allaffissorneq pinngitsoorneqassasoq.

Siunnersuut kommunalbestyrelsimi kommunillu iluani namminermi suliaqarnerup annertunerulernissaanik kinguneqassanngitsoq naatsorsuutigineqarpoq, soorluttaaq inatsisissatut siunnersuutip kingunerisaanik annertunerusunik aningaasartuuteqarnissaq naatsorsuutigineqanngitsoq.

Kommunit kattussuunneranni kommunini qinikkanut aningaasarsianut aningaasartuutit ikinnerulerput. Sipaarneqartut 4,0 mio. kr.-it missaaniipput siornatigut kommuniusuni aningaasartuutaasartunut naleqqiullugit. Ullumikkut kommunalbestyrelsini ilaasortat 72-inik amerlassuseqarput aamma nunaqarfinni aqutsisunut ilaasortat 106-iupput.

Nakkutilliinermut aningaasartuutit ilaatigut aningaasanut inatsimmi konto aqqutigalugu Nunamut Namminermut, Pinngortitamut Avatangiisinullu Naalackersuisoqarfimmit aningaasartuutigineqartarput ilaatigullu aamma aningaasanut inatsimmi konto aqqutigalugu kommuninut Nakkutilliisoqarfimmit aningaasartuutigineqartarlutik. Nunamut Namminermut, Pinngortitamut Avatangiisinullu Naalackersuisoqarfimmut aningaasaliissutit 2010-mi tamarmiusut amerlassuseqarput 18,132 mio. kr.-nirik, taakkunanga 13,944 mio. kr.-nit naalackersuisoqarfimmi aningaasarsianut atorneqartarput. Nakkutilliisoqarfimmut aningaasaliissutit tamarmiusut 2010-mi 55.000 kr.-nirik amerlassuseqarput. Inatsisissatut siunnersuummut atasumik naatsorsuutigineqanngilaq nakkutilliinermut aningaasartuutit allanngornissaat.

4. Inuussutissarsiummik ingerlataqartunut il.il. aningaasaqarnermut aamma allaffissornikkut ingerlatsinikkut kingunerisassai

Siunnersuutigineqartoq inuussutissarsiummik ingerlataqartunut aningaasaqarnermut aamma allaffissornikkut ingerlatsinikkut sunniuteqassanngilaq il.il.

5. Avatangiisinut pinngortitamullu kingunerisassat

Siunnersuut avatangiisinut pinngortitamullu tunngasunut sunniuteqassanngilaq.

6. Allaffissornikkut ingerlatsinikkut innuttaasunut kingunerisassai

Kommunit qitiunerusumik inissisimalissapput aammalu peqatigisaanik nutaanik suliaqalissapput, pisortat suliaannut innuttaasut saaffiginnittarfiattut. Inatsisissamut siunnersuut aaqqissuusseqqinnermik nangitsineruvoq aammalu akisussaaffinnik siammaanerulluni innuttaasullu inatsisitigut illersugaanerat annertunerulersissallugu.

Innuttaasunut ataasiakkaanut tamanna isumaqassaaq ajornannginnerusumik pisortanut saaffiginnissinnaangorneq aamma sukkanerusumik eqaannerusumillu sulisunik pikkorissunik ilinniarluarsimasunillu sullineqarneq taamaasillunilu innuttaasunut ataasiakkaanut inatsisitigut annertunerusumik illersugaaneq kingunerissallugu.

7. Kingunerisassat pingaarutillit allaasinnaasut

Siunnersuut annertuumik allannguutaasinnaasunik imaqanngilaq.

8. Naalagaaffeqatigiinnermut namminersornermullu attuumassuteqartut

Siunnersuut Nalagaaffeqatigiinnerup iluani Namminersorlutillu Oqartussat akornanni sunniuteqassanngilaq

9. Pisortanik kattuffinnik il.il tusarniaaneq

Maajip 3-ini 2010 siunnersuut tusarniutigineqarpoq juunip 14-iata 2010-p tungaanut piffissalerlugit KANUKOKA-mut, kommuninut, Kanunupe-mut, Kommunernes revision (BDO), Deloitte-mut, AK-mut, SIK-mut, IMAK-imut, GA-mut, PIP-mut, ASG-mut, Sundhedskartellet-imut aamma Namminersorlutik Oqartussat Naalackersuisoqarfiinut tamanut.

Tusarniaanermi akissuteqartut makkuupput: P.I.P., Siulittaasup Naalackersuisoqarfia, Aningaasaqarnermut Naalackersuisoqarfik, Ineqarnermut Naalackersuisoqarfik, Peqqinnissamut Naalackersuisoqarfik, Inuussutissarsiutinut Naalackersuisoqarfik, Isumaginninnermut Naalackersuisoqarfik, Kommunernes Revision (BDO), GA, KANUKOKA kommunit sinnerlugit, SIK., IMAK., Kommuneqarfik Sermersooq, Qeqqata Kommunia.

GA, Peqqinnissamut Naalackersuisoqarfik, Qeqqata Kommunia, Aningaasaqarnermut Naalackersuisoqarfik inatsisissatut siunnersuummut oqaaseqaateqanngillat.

Ineqarnermut, Attaveqarnermut Angallanermullu Naalackersuisoqarfik tulliuuttuni imatut tusarniummut akissuteqarpoq: Pissusissamisoortut issorinanngilaq inatsisissamut siunnersuutip allanneqarnera nassuiaatinik aalajangersakkanut tamanut ikorfartorneqanngimmat. Taamaallaat aalajangersakkanut allanngortinneqartussatut siunnersuutigineqartunut nassuiaatitaqarpoq. Ineqarnermut immikkoortortaqrifiup siunnersuutigissaavaa aalajangersakkanut allanut nassuiaatit suliarineqassasut imaluunniit maannakkutut isikkoqartillugit naqqeqinneqassasut.

Siulittaasup Naalackersuisoqarfia tulliuuttuni imatut tusarniummut akissuteqarpoq: Inatsisilerinnermut Allaffiup inassutigissavaa siunnersuut Kalaallit Nunaanni Namminersorlutik Oqartussani inatsisissatut siunnersuutinut taakkununggalu oqaaseqaatinut tunngatillugu malittarisassanik suliarinninnermi maleruagassat naapertorlugit

oqimaaqatigiissarneqassasoq. Siunnersuutip ilusilersornera maleruagassanut oqimaaqatigiissarnissaa immikkut ittumik pisariaqarpoq. Taassuma saniatigut oqaaseqaatit allannguutissatut siunnersuutitut ilusilersorneqarsimasutut isigineqarput. Tamanna eqqunngilaq, uanimi pineqarpoq inatsimmik pingaarnermik nutaamik saqqummiusinnaq.

Ineqarnermut, Attaveqarnermut, Angallanermullu Naalackersuisoqarfiup aammalu Inatsilerinermut Allaffiup oqaaseqaatai tunngavigalugit imatut allanngortinneqarpoq inatsisitaata allanneqarnera aalajangersakkat tamaasa nassuiaatitalersorneqarneri aammalu aalajangersakkat sinneri nassuiaatitalersorneqassasut imaluunniit maannakkutut isikkoqartillugit naqiteqqinneqassasut.

Tusarniummut akissutini allannguutaasut eqqaassanngikkaanni siunnertarineqanngilaq tusarniummi siunnersuutigineqartunut naleqqiullugu allanngortitsisoqarnissaanik.

Kommunernes Revision BDO tulliuttuni tusarniummut imatut akissuteqarpoq: § 6-imut, imm. 4, nalilerneqarnerani §-imut innersuussutip aaqqinneqarnissaanik amigaateqarpoq. § 49 imm. 1, §-imit erserpoq ”kommunit tamarmik Naalagaaffimmit akuerisaasumik kukkunersiorneqartassaaq” Siunissaq isigalugu kiisalu aalajangersakkanik paasinninnermi paatsuuisoqarnissaa pinngitsoortinniarlugu siunnersuutigissavarput Naalackersuisoqarfiup taarsiullugu oqaasiliorneq ”... kukkunersiuineq akuerineqartoq sukkulluunniit kukkunersiuinermi inatsit atuuttoq tunngavigalugu”. Oqaasiliornerata kukkunersiuinermi suliaqartut/inuit tamakkerlugit imarai, naalagaaffimmik akuerisaasut inatsit tunngavigalugu aamma kukkunersiuisartut allattorneqarsimasut (Kalaallit Nunaanni: peqqussut nr. 623 23. juni 2009) Erhvervs- og Selskabstyrelsen-ip inatsisit malillugit kukkunersiuisutut suliarinnittussaatinneqarnera tunngavigalugu. Suliffeqarfiit/inuit akuerisaasut allattorsimaffeqarput taaneqartumik ”REVIREG” taannalu Erhvervs- og Selskabsstyrelsen-imit nakkutigineqarpoq.

Allannguut aamma isumaqarpoq, § 48 allanneqarnermigut iluarsisariaqartoq. Taamaasilluni taamaallaat §-ffi imatut aallartissaaq: ”Kukkunersiuisut oqaaseqaataat...” aammalu imm. 2-imi allanngortinneqassalluni:”... Aamma kukkunersiuisut oqaaseqaataat...§ 72, imm. 3 –mut tunngatillugu § 49-p allanngortinnera tunngavigalugu taava imm. 3 peerneqassaaq.

Kommunernes Revision-ip BDO-p innersuussutai inatsisissamut ilanngunneqarput.

Kanukoka kommunit sinnerlugit tulliuttuni imatut tusarniaanermut akissuteqarput: Kommunit sisamat isumasioqatigereerlugit KANUKOKA-miit inatsisissatut siunnersuummi immikkuualuttunut oqaaseqaatissaqanngilagut.

Kaammattuutigineqassaarli § 33-imi immikkoortoq 2-mi oqaaseqatigiit pitsanngorsaavigineqassasut, tassani oqaatsit ilaannik peertoqarsimasutut isikkoqarsorinarmat, siusinnerusukkut suliaasumut sanilliullugu, taamalu isumaanut atasumik paatsuunganartumik pilersoqarsinnaalluni.

Oqaaseqaatigineqartut tusaatissatut tiguneqarput aammalu aalajangersagaq nalimmassarneqarluni.

Oqaaseqaatit immikkoortuisa pingajuanni § 16-imut atatillugu innersuussisoqarpoq inatsisissatut siunnersuutikkut IT-mi periarfissat atortorissaarutigalugit atsiorsinnaaneq nukittorsaavigineqartoq, kisiannili tamanna inatsisissatut siunnersuutip oqaasertaani namminerme ersinnani.

Aalajangersagaq Kanukoka’p oqaaseqaatani kissaatigineqartutut iluarsineqarpoq.

IMAK tulliuuttuni imatut tusarniummut akissuteqarpoq: Siulersuisut isumaqanngillat nunaqarfinni immikkut ittumik aalajangersagaqarnera nunaqarfinni aqutsisoqarnera pillugu ingerlatiinnarneqassasoq, tassami illoqarfinni inuit qinigaannik sinniisoqanngimmat. Tamanna inuit tamat oqartussaaqaataanerannut akornusiivoq. Taassuma saniatigut malugeqquneqarpoq § 51 imm. 3-imi kukkuneq ataaseq taasinermi amerlassutsit.

Naalackersuisut nunaqarfinni aqutsisoqaannarnissaa kissaatigaat IMAK-illu allannguutissatut siunnersuutaa inatsisissamat siunnersuummut ilaatinneqanngilaq. § 51 imm. 3 tusarniummut akissuummut ilaatinneqartoq iluarsineqarpoq.

Isumaginninnermut Naalackersuisoqarfik tulliuuttuni tusarniummut imatut akissuteqarpoq: Maluginiarneqarpoq inatsisissatut siunnersuutip arlalitsigut inatsisissamat siunnersuuteqarnermi piumasaaqatitut malittarineqartussat atunngikkai soorlu Namminersornerullutik Oqartussat/Namminersorlutik Oqartussat maleruagassaliornermi malitassatut siunnersuutaanisut.

Inatsisissatut siunnersuutip qulequtaa imaattariaqaralarpoq Inatsisartut inatsisissaatut siunnersuut nr...

Inatsisissatut siunnersuummi qupperneq siulleq qupperneq 3-mik allanneqassaaq.

§ 33, imm. 2 oqaaseqatigiit siulliit paasinanngilaq oqaaseqatigiit pingaarnertit naammassineqanngimmata oqaaseqaatigiit saniatigut allanneqartut kingorna.

Nassuiaatit nalinginnaasut imm. 1. Inatsisissatut siunnersuutip tunuliaqutai: ersarissumik saqqummiunneqanngilaq nutaatut pingaarnertut suna siunnersuutigineqarnersoq.

Nassuiaatit nalinginnaasut imm. 2. Inatsisissatut siunnersuutip imai: Inatsisissamat siunnersuusionerme malittarisassatut innersuussutigineqartut allanneqarnera kukkuneqarpoq.

Nassuiaatit nalinginnaasut imm. 2.10 – atuutilerfissaa kukkullugu allaneqarpoq.

Nassuiaatit nalinginnaasut imm. 9. tassani allassimangilaq kimut siunnersuut tusarniaatigineqarsimanersoq.

Aalajangersakkanut aalajangersimasunut nassuiaasiortoqarsinnaanngilaq allallu minillugit. Inatsisissamut siunnersuummi aalajangersakkat tamarmik nassuiaatitaqassapput. Inatsisissatut siunnersuut tamaat ataatsimut isigalugu peqissaarunnagu suliarineqarsimavoq.

Inatsisissatut siunnersuut allanngortinneqarpoq.

SIK tusarniummut tulliuuttuni imatut akissuteqarpoq: § 57, imm. 3 SIK isumaqarpoq kommunit atorfinitsitsisarnermi maleruagassanik malinnittarnerat pillugu Naalackersuisut nakkutilliisarunnaarnissaannik siunnersuut attanneqarsinnaanngitsoq.

Kommunit suliffeqarfittut angissusertik aammalu inuiaqatigiinni pingaaruteqassusiat aallaavigalugu sulisitsisutut pingaaruteqarluinnarput. Taamaattumik sunniuteqarpoq suliffeqarnerup tungaatigut qanoq pissusilersortarnerisut, ingammik atorfinitsitsisarnerup tungaatigut.

Kommunit pisortat suliffeqarfiutaat allat ilutigalugit akissarsiat, atorfinitsitsisarnerup aammalu soraarnerussutisiaqalernissap tungaatigut pitsaasumik ersarissumillu sulisuminnut atugassaqartitsinissaminnut immikkut pisussaaffeqarput. Taamaattoq aamma pisussaaffigaat tamatuma, suliffeqarnerup tungaatigut isumaqatigiissuteqartartut sinaakkusiussimasaannik killiliussanik uniuillutik iliuseqarnissaat qulakkeerneqartariaqarpoq, taamaasilluni suliffeqarnerup iluani atukkat naligiinngitsut naapertuilluanngitsullu pinngitsoortinniarlugit.

Kalaallit Nunaanni suliffeqarnerup tungaatigut inatsisit tamakkiisumik suliarineqarsimannginnerat pequtigalugu kommunini atorfinitsitsisarnerup tungaatigut ersarissumik paatsuugassaannngitsumillu malittarisassiorfiginissaa pingaaruteqarpoq, aammalu SIK-p tungaaniit pissusissamisoortutut isigineqarpoq sulisoqarnerup tungaatigut isumaqatigiissutit kommunini naligiinngitsumik akissarsiaqartitsinikkut atorfeqartitsisarnikkullu mangiarneqalinnginnissaat.

SIK isumaqarpoq pissusissamisoortoq kommunini aaqqissuusseqqinnerup malitsigisaanik nakkutilliinissaq oqinnerulersimassasoq. SIK tamanna aallaavigalugu inassutigissavaa kommunit atorfinitsitsisarnerup tungaatigut inatsisitigut maleruagassat eqquutsinneraat ilumut naalackersuisuniit ilanngullugu nakkutigineqassasoq.

§ 68, suliffeqarnerup tungaatigut tusarniaaffigineqartartut akuutinneqartariaqarput, tassami SIK pingaarutilimmik susassaqtutut tusarniaaffigineqartartutullu inissisimanermini ilisimasanik misilittakkanillu pigisaqarmat, pissusissamisuuginnassaaq kommunini sulisut atugaat pillugit kattuffik sunniuteqaqataatinneqassappat.

Kommunit atorfinitsitsisarnermi maleruagassanik ilumut eqquutsitsinersut pillugu naalackersuisut nakkutilliisussaataanerat atuutilissanngippat, taava nakkutilliinermit atugassanik aningaasaliisoqartariaqarpoq, tassanilu SIK-p pisinnaasani neqeroorutigerusuppai.

Naalackersuisut ukiuni amerlasuuni periutsip allanngortinnissaa pisariaqartutut isiginngilaat nakkutilliinerup atorfinitsitsisarnermut apeqqutinut tunngasut ilaatinneqartarnissaat. Tamanna nakkutilliinermit ilaattillugu eqqortumik ingerlatsinissamut tunngatinneqarmat takuuk § 57, imm. 1, kommunit nalinnginnaasumik isumaqatigiinnerit aammalu suliaasaqarfinnut tunngasunut malittarisassanik nakkutilliinermit pisinnaatitaaffittut ilaanngitsut.

Kommuneqarfik Sermersooq tusarniummut tulliuttuni imatut akissuteqarpoq: Kommuneqarfik Sermersuumit naleqqussorineqarpoq kommuninik kattussuussinerup kingorna kommunit aqunneqarnerat pillugu inatsimmi iluarsiiisoqassappat, taamattorli Inatsisartut allannguuteqartitseqqinnissamik siunniussisimanissaat kommunimit kissaatigineqaraluarpoq. Innutaasut ilanngutsinneqarnerisa najukkamilu oqartussaaqataanerup nukittorsarneqarnissaat siunertaralugu kommunalbestyrelsip immikkut pisoqartillugu “immikkut ataatsimiititani” § 31, imm. 3 naapertorlugu pilersinneqartuni sulinermit akissarsisitsinissamut aalajangiisinnaanissaata periarfissinneqarnissaa kommunalbestyrelsip kissaatigigaluarpaq, kommunerujussuarni sisamani sumiiffiit ungasimmata elektroniskimillu periarfissaqarmat ilimagineqartariaqarpoq suliami paasissutissat siunissami ilaasortanut elektroniskimik siammarterneqarnerulissasut. Tamatuma periarfissatut inatsisit oqaasertaani allassimanissaa kissaatiginassaaq. Kiisalu ungasinnerusoq eqqarsaatigalugu suliami paasissutissat ilaasortanut elektroniskiinnarmik siammarterneqartalerlutik.

§ 15, imm. 2-mut ilassut qaammatinit marlunnit sivilunerusumik kommunalbestyrelsimiinnginnissamik allakkatigut piunasaqartarnermut tunngasooq kommunimit naleqqulluinnarsorinarpoq.

§ 16 Piviusumi/sulinermit ataatsimiinnermut atatillugu telefonikkut videokkullu ataatsimeersuarnissap atortariaqarnera pisariaqartinneqariartuinnarmat oqaasertaa imaattariaqarpoq paragraffi taanna siunissamut qularnaarneqartoq, ass. atsiornernik scannikkanik elektroniskimilluunniit atsiornernik atuinissamik ammaassinikkut, fax-kopiinullu ass. atsiornernik taasiinnarani.

Naalackersuisut isumaqarput annertunerusumik akissarsiat saniatigut kommunimi suliaqartilluni akilerneqartalernissaat pisariaqartoq. Naalackersuisut isumaqarput pisortat aningaasartuutaat annikillisarneqassasut.

Naalackersuisut isumaqarput inatsisip oqaasertai elektroniskimut atortorissaarutit eqqarsaatigalugit naammattut aamma takuuk Kanukoka-p oqaaseqaatai tunngavigalugit iluarsineqartut.

Aalajangersakkanut ataasiakkaanut oqaaseqaatit

§ 1-mut

Imm. 1-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 1-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Aalajangersakkami aalajangerneqarpoq kommunimi suliassat aqunneqarnerat pillugu kommunalbestyrelsi akisussaasuusoq.

Imm. 2-mut

Aqutsinermut ileqqoreqqusaq taamaallaat pingaarnerusutigut imaqassaaq kommunalbestyrelsimi ilaasortat amerlassusaannik, borgmesterip tulliisa qassiunissaannik, ataatsimiititaliat ataavartut amerlassusissaannik taakkualu oqartussaaffissaannik, nunaqarfinni aqutsisut qassiunissaannik taakkualu ilaasortaasa amerlassusiannik oqartussaaffigisassaasalu suunissaannik.

Aammattaaq anguniagaavoq matumani inatsimmi aalajangersakkat aqutsinermut ileqqoreqqusami uteqqinneqartassanngitsut, assersuutigalugu aningaasaqarnermut ataatsimiititaliap sunik oqartussaaffeqarneranut tunngasut.

Imm. 3-mut

Kommunalbestyrelsip anguniassavaa, suliassat ingerlanneqartarnerannut pissutsit tamarmik kommunalbestyrelsip suleriaasissatut maleruagassiaani katersorneqassasut, tamakkulu aalajangersakkat aqutsinnermut ileqqoreqqusamiissanngitsut.

Imm. 4-mut

Suleriaasissamut aammalu aqutsinermut ileqqoreqqusat nassiunneqarnissaanut piumasaaqat tunulequtaqarpoq Naalakkersuisut kommunalbestyrelsip sulianik ingerlatseriaasiat pillugu aalajangersakkanik aamma inatsisit atuutinneqarnerannik nakkutilliinermik ingerlataqarmata. Kommunalbestyrelsip suleriaatsimut malittarisassaq aamma aqutsinermut ileqqoreqqusaq Naalakkersuisunut nassiutinngippagit suleriaasissamut nalinginnaasumik malittarisassaq imaluunniit aqutsinermut nalinginnaasumik ileqqoreqqusaq kommunalbestyrelsip sulinerani paatsuungasoqartillugu atorneqassapput. Periutsit taamaattut aamma atuutissapput kommunalbestyrelsip suleriaasissamut malittarisassaq aamma aqutsinermut ileqqoreqqusaq aalajangersarsimagaluarlugit taakkua Naalakkersuisunut nassiussimanngippagit.

Imm. 5-imut

Aalajangersakkap siunertaraa qulakkiissallugu kommunalbestyrelsimi aqutsinermut ileqqoreqqusamik aamma suleriaatsimut malittarisassanik peqartuaannarnissaa. Aalajangersagarli kommunalbestyrelsip kommunimi namminerisamik aqutsinermut ileqqoreqqusamik suleriaasissamullu malittarisassaqaarnissaanut pisussaaffeqarneranik atorunnaarsitsinngilaq.

Kiisalu suleriaatsimut malittarisassaqa aamma aqutsinermut ileqqoreqqusaaq nalinginnaasut maleruagassat qanoq paasineqaarnissaannik nalornisoornermi isummertarnermut atorneqartussaapput.

§ 2-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 2-mik ingerlatseqqinneruvoq imarisamigullu allannguuteqanngilaq.

Kommunip ilisarnaataa kommunimi pineqartumi oqartussaasut kisimik atugassaraat. Taamaattoq ilisarnaatip atorneqaarnissaanut qinnuteqartoqartillugu pinerit tamaasa allat ilisarnaammik atuisinnaanerannut kommunalbestyrelsi akuersisinnaavoq. Ilisarnaatip aningaasarsiutitut atorneqaarnissaanut akuersineq sullissinermut akiliuteqarnissamik piumasqaammik ilaqartinneqaarsinnaavoq. Kommunip ilisarnaataa allanngortinneqaarsinnaavoq Naalakkersuisut akuersiteqqaarlugit.

Imm. 1-imut

Kommunip ilisarnaataanik oqartussat atuinerisa avataanni atuinissamik kommunalbestyrelsip akuersissummik tunniussitinnani qulakkeertariaqarpaa ilisarnaammik allanit atuineq imatut pissasoq, atorneqarnera kommunit oqartussaaffiitut ersarissumik attuumassuteqannginnera tamanit nalornisoqaarsinnaajunnaarlugu.

Kommunalbestyrelsip siuoorlugu qulakkiissavaa suliffeqarfinnut namminersortunut kommunip ilisarnaataa kisimiitillugu ilisarnaatitut imaluunniit ilisarnaatitut pingaarnertut biilini imaluunniit allakkat pappiliartaani ilisarnaatitut kisimiitillugu atorneqannginnissaa.

Qinnuteqaat kommunalbestyrelsimut nassiuunneqassaaq, akuersissullu tunniunneqarpat tamanna imaqassaaq ilisarnaat qanoq sivilutigisumik atorneqassanersoq.

Kommunalbestyrelsip akitsuummik akiliutissamik ataasiartamik aalajangersaasinnaavoq imaluunniit piffissamut aalajangersimasumut akilertagassatut, kommunip ilisarnaataata qanoq atorneqaarnissanut akuersissuteqarneq qanoq ittuunersoq naapertorlugu.

Assersuutigalugu naqitiganngorlugu ilisarititsiniutitut imaluunniit takoqqusaarutitut kommunip ilisarnaataata atorneqaarnissaa akuersissutigineqarpat, tamanna ataasiartuuppat, ataasiartumik akilernerneqarnissaa aalajangerneqaarsinnaavoq, piffissamili siviluuni, soorlu puussiani ataasiarlugu atorneqartartuni ilisarnaatitut atorneqarpat piffissami aalajangersimasumi akilertagassatut aalajangerneqaarsinnaalluni.

Kommunalbestyrelsip kommunip ilisarnaataata atorneqaarnissaanut qinnuteqaatip suliarineqarneranut atatillugu aningaasartuutaasut qaangerlugit akiliutissamik annertussusiliisnaannngilaq.

Akiliut kommunip isertittagaatut allatulli missingersuusioneqassaaq, missingersuusiallu akuersissutigineqareersut avataatigut aalajangiivigineqassaguni ilassutitut akuersissutigineqartariaqarsinnaavoq.

Kommunip ilisarnaataanik atuinissamik akuersissummi ersarissumik takuneqarsinnaasariaqarpoq piumasaqaataasut suut malillugit ilisarnaammik atuinermut akiliut aalajangersarneqarsimanersoq, taamaasillunilu misissorneqarsinnaalluni akuersissutit naligiissuseq tunngavigalugu tunniussisoqarsimasoq.

§ 3-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 3-mik ingerlatseqqinneruvoq imarisamigullu allannguuteqanngilaq.

Imm. 1-imut

Kommuneqarfik Sermersuup – aamma Qaasuitsup kommuniani kommunalbestyrelsit 21-t qinerneqarsinnaasut aammalu Qeqqata kommuniani aamma Kommune Kujalleq-mi 15-nit qinerneqarsinnaallutik. Aalajangersagaq aaqqissuusseqqinnerup maanna ingerlanneqartup kingunerivaa.

Imm. 2-mut

Kommunalbestyrelsi ukioq naatinnagu qinersinissaq sioqqullugu kommunalbestyrelsinngortussat amerlassusissaat aalajangersinnaavaat. Ilaasortat amerlassusiat 2-mik agguarneqarsinnaassanngilaq aqutsinermilu ileqqoreqqusami allassimassalluni. Suliassaqrifiit aaqqissuuteqqinneqarnerata ingerlanneqartup siunertaasa ilagivaat allaffissornermi aningaasartuutaasuniit ilanngaasoqassasoq inuussutissarsiornerup ineriartortinneqarneranut nuunneqartussanik. Tamanna tunuliaqutaralugu kommunini suliassaqrifiit aaqqissuuteqqinneqarnerat pillugu Inatsisartut inatsisaanni kommunini sisamani kommunalbestyrelsit amerlassusaasa qaffasinnerpaaffissaannik ilanngussisoqarpoq. Naalakkersuisut isumaqarput qaffasinnerpaaffisaliinerup ingerlateqqinneqarnissaa pingaaruteqartoq, kisiannili kommuuni kommunalbestyrelsimi ilaasortat amerlassusaannik ikinnerusunik aalajangiussaqaassappat akornutissaqartinnagu.

§ 4-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 4-mik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersarneqarpoq kommunalbestyrelsip nutaamik qinigaasup inissitsiterluni ataatsimiinnissaa, aatsaat ingerlanneqarsinnaasoq Qinigaasinnaassuseq pillugu

Ataatsimiititaliap kommunalbestyrelsimi ilaasortat qinigaasinnaanerisa misilinneqarneri naammassereerpagit.

Kommunalbestyrelsimi ilaasortat qinigaasut, kommunalbestyrelsi atuuttusoq ingerlaannassaaq, qinigaasinnaassutsip misilinneqarnerisa naammassinissaata tungaanut. Kommunalbestyrelsip inissititerluni ataatsimiinnissaanut qaaqusissut allakkatigut pissaaq, tamatumani fax-i imaluunniit e-mail atorneqarsinnaavoq.

Imm. 2-mut

Ataatsimiinneq inummit ataatsimiigiaqquisumit aquneqassaaq. Aalajangersakkami inissitsiterluni ataatsimiinnermut ilaasortaq qaaqusisoq peqataasinnaangippat periusissaq sillimaffigineqarpoq. Aalajangersakkami isumaqatigiinniarnerni eqqartorneqartuni taamaallaat inissititerluni ataatsimiinneq pineqarpoq, tassunga ilanngullugu borgmesterimik qinersineq.

§ 5-mut

Aalajangersagaq maanna kommunit aquneqarnerat pillugu Inatsisartut inatsisaat nr. 14, 5. december 2008-meersumi atuuttumit § 5-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Aalajangersagaq manna aamma § 19 peqatigalugu Inatsisartut inatsisaanni matumani aalajangersagatuaapput tassaasut aalajangiussisut kommunimi allaffissornikkut aqutsinermi pisortatut suliasat borgmesterip pisortaaffigai.

Aalajangersakkami aalajangerneqarpoq, allaffissornikkut aqutsinermik aaqqissuussineq tassaasq kommunalbestyrelsi qullersaralugu aqutseriaatsimut ilaasq. Allamik immikkut inatsimmi aalajangersaasoqarsimatinnagu kommunalbestyrelsi ingerlatsivinnut suliasanut tunngatillugu akisussaaffinnik tunniussisarnissamik nammineerluni aalajangersagaliorsinnaavoq.

Aalajangersakkami erseqqissarneqarpoq kommunalbestyrelsip aamma aningaasaqarnermut ataatsimiititaliap sulisunik atorfinitsitsisarnerni soraarsitsisarnernilu suliasaasa avissimanerat, taamaasillunilu kommunalbestyrelsip taamaallaat kommunaldirektøri atorfinitsittarlugulu soraarsissinnaagaa, aningaasaqarmermulli ataatsimiititaliap sulisoqarnermi pissutsit allat aqussallugit, tak. § 25, imm. 1, nr. 2.

§ 6-mut

Aalajangersagaq maanna kommunit aquneqarnerat pillugu Inatsisartut inatsisaat nr. 14, 5. december 2008-meersumi atuuttumit § 6-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersakkami aalajangerneqarpoq inissitsiterluni ataatsimiinnermi borgmesterimik qinersineq siulliulluni oqaluuserisassaniissasq.

Imm. 2-mut

Aalajangersakkami aalajangerneqarpoq naqissuserlugu, borgmesterimik qinersinermi amerlanerussuteqarnissaq piumasagaataasoq. Siullermeerluni qinersinermi amerlanerussuteqartoqanngippat qinerseqqittoqassaaq. Qinersinermi tamatumani qinigassani amerlanerussuteqavittoqanngippat aamma nutaamik qinersisoqaqqissaaq amerlanerpaanik qinerneqarsimasut marluk akornanni. Qinersisoqaqqinnerani naligiittumik taasisoqarpat makitsisoqassaaq. Makitsisineq kommunalbestyrelsimut ilaasortamit inissitsiterluni ataatsimiinnermi aqutsisuusumit ingerlanneqassaaq.

Imm. 3-mut

Aalajangersakkami borgmesterip tullianik qinersineq maleruagassiorneqarpoq, borgmesterillu tullianik qinersineq borgmesterimik qinersinertut ingerlanneqassasoq aalajangersarneqarluni. Aammattaaq naqissuserneqarpoq borgmesterinngorlaap qinersineq aqussagaa. Borgmesteri peqanngippat borgmesterip tullianik qinersineq kommunalbestyrelsimi ilaasortap inissitsiternissamut qaaqqusisuusup aqussavaa.

Imm. 4-mut

Aalajangersakkami maleruagassiorneqarpoq kommunalbestyrelsip aqutsinermi ileqqoreqqusami aalajangersagaqarnera naapertorlugu borgmesterip tullianik siullermik aamma borgmesterip tulliaa aappaanik qinersisoqassappat. Taamaattoqartillugu § 35 naapertorlugu ilaasortaataitaqartut qanoq amerlatigisunik ilaasortaqaassusiat naapertorlugu kisitsisit agguarnerat naapertorlugu naatsorsueriaaseq atorlugu qinersineq ingerlanneqassaaq. Aalajangersakkap erseqqissarpaa borgmesterip tullianik ataatsimik qinersisoqartillugu amerlanerussuteqarneq tunngavigalugu qinersineq ingerlanneqassasoq, kisiannili borgmesterip tulliaanik marlunnik qinersinermi ilaasortaataitaqartut qanoq amerlatigisunik ilaasortaqaassusiat naapertorlugu kisitsisit agguarnerat naapertorlugu qinerseriaaseq atorlugu qinersineq ingerlanneqassasoq.

Imm. 5-imut

Aalajangersakkap erseqqissarpaa, borgmesterimik aamma borgmesterip tullianik qinersineq kommunalbestyrelsip qinigaaffianut tamarmiusumut atuuttusoq. Taamaalilluni aallaaviatigut imaappoq; kommunalbestyrelsip atuuffiata iluani kommunalbestyrelsip borgmesteri aamma borgmesterip tullia tunuartissinnaanngikkaat imaluunniit peersissinnaanngikkaat. Akerlianik § 23 naapertorlugu borgmesteri suliassaminik naammassinnikkumangippat kommunalbestyrelsip tunuartitsisinnaanera periarfissaqarpoq.

§ 7-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 7-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersakkap naqissuserpaa, kommunalbestyrelsimut qinersinermi qinigaasunut borgmesteritut aamma borgmesterip tulliatut qinigaanermik akuersissuteqartussaaneq pisussaaffiusoq. Tamatumani pissusissamisoortut isigineqarpoq kommunalbestyrelsimut ilaasortassatut qinigaasut kommunalbestyrelsimut qinigassanngortinnermikkut aamma borgmesteritut imaluunniit borgmesterip tulliatut qinerneqarsinnaaneq akuersissutigisimammassuk. Qinigassanngortittoq kingornagut borgmesteritut imaluunniit borgmesterip tulliatut qinigaanissamik kissaateqanngippat qinigassanngortittariaqanngilaq.

Imm. 2-mut

Aalajangersakkap kommunalbestyrelsi periarfissippaa borgmesteri imaluunniit borgmesterip tullia qinigaaffiup sinnerani atuuttussaajunnaartitsisinnaanermut, borgmesteri imaluunniit borgmesterip tullia atorfimmit tunuarniuteqassapat. Tunuarniuteqarnerup akuersissutigineqarneri suliani ataasiakkani nalilersuinikkut pisassaaq.

Imm. 3-mut

Aalajangersakkap naqissuserpaa, borgmesterimik imaluunniit borgmesterip tullianik nutaamik § 6 naapertorlugu qinersisoqassasoq, borgmesterip imaluunniit borgmesterip tullia atorfik qimappagu. Aammattaaq erseqqissarneqarpoq, kommunini borgmesterip tullia aappaannik peqartuni borgmesterip tulliatut inuttaaruttoq ilaasortaataqartut qanoq amerlatigisunik ilaasortaqassusiat naapertorlugu kisitsisit agguarnerat naapertorlugu naatsorsueriaaseq naapertorlugu eqimattat (suleqatigiit) borgmesterimut tulliusimasumik toqqaasimasut aamma nutaaq toqqassagaat.

§ 8-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 7-imik ingerlatseqqinneruvoq imarisamigullu allannguuteqanngilaq.

Imm. 1-imut

Ukiumut naatsorsuuseriffiusumut tamarmiusumut kommunalbestyrelsi ataatsimiinnissami missingersuummik aalajangersaasassaaq. Ataatsimiittarnissamut pilersaarut saqqummiunneqassaaq kingusinnerpaamik ukiup naatsorsuiffiup aallartinnerani. Saqqummiussineq kommunip nittartagaani imaluunniit piffimmi aviisimi saqqummiunneqarsinnaavoq.

Ataatsimiinnissanut pilersaarut aammattaaq Naalakkersuisunut nassiunneqartassaaq, kommunit nakkutigineqarneranut atatillugu ilisimatitsissutigineqassammat qaqugu kommunalbestyrelsip ataatsimiinneri ingerlanneqassasut, aamma Naalakkersuisut ataatsimiinnerni najuukkusuppata.

Imm. 2-mut

Aalajangersakkap qulakkeerpaa ataatsimiinnerit pilersaarusionerinit atatillugu annerpaamik kommunalbestyrelsi nutaamik qinigaasup kiffaanngissuseqarnissaata qulakkeerneqarnissaa. Pissusissamisussanngilarmi kommunalbestyrelsi qinigaarlaaq kommunalbestyrelsip atorunnaartup ataatsimiinnissami pilersaarutaanik tunngaveqarluni ingerlatsissappat.

Imm. 3-mut

Kommunalbestyrelsip immikkut ittumik ataatsimiinnissaanut qaaqqusinnaatitaaneq borgmesterimiippoq. Taamaattoq borgmesteri pisussaataitaavoq kommunalbestyrelsimi immikkut ataatsimiigiaqqusinissamut kommunalbestyrelsimi ilaasortat 1/3-iisa tamanna piumasaqaatigippassuk.

Immikkut ittumik ataatsimiinnissamik nalunaarut kommunip innuttaannut aamma Naalackersuisunut ataatsimiinnissaq sioqqullugu periarfissaqarpat nalunaarutigineqassaaq. Kommunalbestyrelsip ataatsimiinnissaanut qaaqqusinerit avammut ilisimatitsissutigineqarnerat aamma ullormut oqaluuserisassat avammut saqqummiunneqarnerat kommunip nittartagaanut ingerlanneqartassasut aalajangiussimappagu, kommunip nittartagaani immikkut ittumik ataatsimiinnissat aamma saqqummiunneqarneri ataatsimiinnissaq sioqqullugu ingerlanneqartassapput. Avammut saqqummiussineq piffimmi aviisini ingerlanneqarpat saqqummiussinissamut piumasaqaatit eqqarsaatigalugit eqaannerusumik ingerlatsisoqassaaq.

Imm. 4-mut

Piffissaliineq aalajangerneqarluni ilanngunneqarpoq ataatsimiinnissaq sioqqullugu kommunalbestyrelsimut ilaasortat suliassamut pitsaasumik paasisaqarsimanissaat qulakkeerniarlugu. Aalajangersagaq aammattaaq sunniuteqassaaq kommunalbestyrelsip ataatsimiittarneri pillugit ammanerusumik ingerlatsinissamut, soorunami nipangiussisussaataitaaneq tamatumani ilanngullugu eqqarsaatigineqassalluni.

Imm. 5-imut

Aalajangersagaq kommunalbestyrelsip sulinermini avammut ammasuunissaanut nukittorsaataassaaq. Suliassat allattorsimaffiat saqqummiunneqartussaq ullormut oqaluuserisassanut missingersuut pinngitsoorani assigisariaqanngilaa. Imarisaanut allattorsimaffilli minnerpaamik suliassat sunik imaqarnerinik imaqassaaq. Allattorsimaffimmi suliassat ammasumik ataatsimiinnermi aamma matoqqasumik ataatsimiinnermi suliassatut aalajangersarneqarsimasut ilanngunneqassapput, soorunami nipangersimasussaataitaaneq eqqarsaatigereerlugu.

Ataatsimiinnermi aalajangersarneqartunut imaqarniliap saqqummiunneqarnerani nipangiussisimasussaataitaanermut inatsimmi pisussaattitaaffik kisimi killiliisuuvoq. Ataatsimiinnermi matoqqasumi aalajangiineq pippat, taanna nammineq kisimi pissutaatinneqarsinnaanngilaq aalajangiinerup imaqarniliamut avammut saqqummiunneqartumut ilanngunneqannginneranut.

§ 9-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 9-mik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut

Suleriaasissami nalinginnaasumi matup matuneqarnissaanik malittarisassanik ikkussisoqarsinnaavoq. Matunik matusineq kommunalbestyrelsi nalinginnaasumik suleriaasissaani § 1, imm. 2 atorneqartariaqarpoq:

1) Suliassat, inunnut ataasiakkaanut tunngasunik naliliisoqassatillugu

2) Suliassat illusinermut imaluunniit tunisinermut tunngassuteqartut

3) Missingersuutit imaluunniit neqeroorutit sanaartornermut tunngasut tunniutassallu

Kommunimi atorfillit kommunalbestyrelsip kiffartuunneqarnissaanik pisariaqartitsisoqartillugu soorunami ataatsimiinnermi matoqqasumi peqataasinnaapput.

Imm. 2-mut

Aalajangersakkap kommunalbestyrelsi periarfissippaa inuit kommunalbestyrelsip avataaniittut kommunalbestyrelsip matoqqasumik ataatsimiinneranut aggersaasinnaanngorlugit. Tamatumani piumasaqaatigineqarpoq pineqartoq suliarineqartumi paasissutissiisinnaassasoq pineqartorlu kommunalbestyrelsip akisussaassuseqartumik pisariaqartumik suliassami aalajangiinissaanut ilisimasaqartuussasoq.

Naqissuserneqassaaq aalajangersakkami siunertaanngimmat aalajangersassallugu, inuit aalajangersagaq malillugu aggersarneqartut kommunalbestyrelsip piumasaqarneranik malinnittussaanagerat, tamanna ataasiakkaani immikkut aammalu pineqartup kommunalbestyrelsimut pisussaataaffii pillugit aalajangerneqartariaqarmat inatsisit allat naapertorlugit. Aalajangersagaq malillugu kommunalbestyrelsimi ilaasortaq attuumassuteqarnini pissutigalugu aalajangeeqataasinnaajunnaarsimasoq aggersarneqarsinnaassanngilaq.

Imm. 3-mut

Aalajangersakkap naqissuserpaa kommunalbestyrelsimi ilaasortanut, atorfilinnut, allanullu matoqqasumik ataatsimiinnermi peqataasunut nipangiussimasussaataaneq attuummat Kalaallit Nunaanni pinerluttulerinermi Inatsit tunngavigalugu. Tamanna kommunalbestyrelsini matoqqasumi ataatsimiinnerni atuuppoq, taamattaq ataatsimiititaliani ataavartuni aamma immikkut ataatsimiititaliani isumalioqatigiissitalianilu atuulluni.

Imm. 4-mut

Aalajangersakkami Naalackersuisunut innersuussisoqartillugu, Naalackersuisut nammineerlutik pineqanngillat, kisiannili nakkutilliisoqarfimmit aallartitaannut ataatsimiinnerni matoqqasuni peqataasinnaatitaasut pineqarput. Ataatsimiinnerni matoqqasuni suliani peqataasinnaatitaaneq taamattaq atuuppoq suliassaqarfinni inatsisini immikkut

nakkutilliisoqartussaananerani aalajangiisimasoqartillugu, soorlu inunnik isumaginninnermut tunngasuni.

§ 10-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 10-mik ingerlatseqqinneruvoq imarisamigullu allannguuteqanngilaq.

Pingaarnertut aalajangersagaavoq kommunalbestyrelsimi suliarineqartut ataasiaannartumik suliarineqartassasut, inatsimmi allamik aalajangersaasoqarsimatinnagu.

Aqutsinermik ileqqoreqqusap akuersissutigineqarnera, tak. § 1, imm. 2, aamma missingersuutip akuersissutigineqarnera, tak. § 41, kommunalbestyrelsimi marloriarluni suliarineqartassaaq.

§ 11-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 11-mik ingerlatseqqinneruvoq, oqaasertai allannguuteqarput imarisamigullu allannguuteqanngilaq.

Imm. 1-imut

Kommunalbestyrelsi aalajangiisinnaassuseqarpoq ilaasortat affaat ataatsimiinnermi peqataappata. Piumasaqaataavoq ataatsimeeqataasuni aalajangertoqassatillugu amerlanerussuteqarnissaq. Taamattaq naqissuserneqassaaq inatsisini aalajangersagaqarmat allanik aalajangersaanerani periutsinik allanik piumasaqaateqartunik.

Imm. 2-mut

Aalajangersakkami aalajangerneqarpoq aalajangersakkami § 15, imm. 1 naapertorlugu ilaasortaq ataatsimiinnermi ornigulluni peqataasinnaanngippat oqarasuaatikkut imaluunniit isiginnaarutitigut aammalu telefaxikkut ataatsimiinnermi peqataanissamut ilaasortaq periarfissaqartinneqartoq. Telefaxikkut piumasaqaat ilanngunneqarpoq aalajangiinnermi imaqaarniliani atsiornissaq qulakkeerniarlugu, tak. § 16, imm. 1.

Imm. 3-mut

Aalajangersakkami aalajangiunneqarpoq kommunalbestyrelsip suleriaatsimini maleruagassiorsinnaagaa ataatsimiinnerit oqarasuaatikkut ataatsimiinnertut, videokonference-tut allatulluunniit ingerlanneqarsinnaanerat. Aalajangersagaq aamma siunissamut qulakkeerinninniarnuvoq attaveqaatitigut teknologi atorneqarsinnaasussaq iluaqutigineqarsinnaasooq, minnerpaamilli isumannaarneqartariaqartoq ilaasortat isummernerisa tiguneqarnissaat ataatsimeeqataasunillu tamanit paasineqarnissaat. Aammattaq qulakkeerneqassaaq attaveqaatitigut teknologip atorneqarnerani aalajangiinnermi imaqaarniliap atsiorneqarsinnaaneranut periarfissaqassasooq, tak. § 16, imm. 1.

§ 12-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 12-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersakkap kommunalbestyrelsimi ilaasortat kommunip allaffissornerani suliat inaarutaasumik ilusilinnik misissuisinnaanerat periarfissippai. Sulianut misissuisinnaanermut siunnersuut naapertorlugu taamaallaat tunniussisoqarsinnaavoq, kommunalbestyrelsimi ilaasortap ilaasortatut sulinerminnut atatillugu misissuinerani, aammalu suliasat naammassineqareersimasut pineqartillugit. Taamaalilluni missingersuutinik, notat-inik taamaaqataanillu kommunip allaffissorneraniit tunniussisoqarsinnaanngilaq, aammalu aningaasaqarnermut ataatsimiititaliami ilaasortaannigitsunut aningaasaqarnermut ataatsimiititaliap suliaanut tunngasunik tunniussisoqarsinnaanani.

Imm. 2-mut

Aalajangersakkami naqissuserneqarpoq suliamik paasisaqarnissamik kissaateqarnerit borgmesterimut saaffiginnissutigineqartassasut.

Imm. 3-mut

Aalajangersakkami naqissuserneqarpoq borgmesterip sulianut paasisutissiisinaanermi itigartitsissuteqarsinnaasoq, sulianik kinguarsaasoqassappat, imaluunniit taamaaliorneq ajornartorsiuutinik pilersitsisinnaappat. Assersuutigineqarsinnaapput allakkatigut suliat ataatsimut inissisimangippata imaluunniit allakkatigut suliat annertoorujussuuppata. Sulianut paasisutissiinermut itigartitsineq sunaluunniit toqqammavilersorluarsimassaaq.

Imm. 4-mut.

Siunnersuut naapertorlugu suliamut atugassat nuutinneri nassiunneqarsinnaapput. Suliat nuutinnerinik tunniussinissamut kommunalbestyrelsi pisinnaavoq aalajangersaasinnaanissaminik. Aalajangersakkap kommunalbestyrelsi periarfissippaa suliamut nuutitanik tunniussinissami najoqqutassanik nalinginnaasunik aalajangersaasinnaalersillugu taamaalillunilu suliani aalajangersimasuni nuutitsinerit amerlassusaannik nalinginnaasumik killiliisinnaalersillugu. Killiliineq taamaallaat nuutitat qassiusinnaanerinut attuumassuteqarpoq, taamaalillunilu nammineerluni ingerlatsivimmut ornigulluni suliamut attuumassutilinnik qimerluuisinnaanermut attuumassuteqarani.

§ 13-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 13-imik ingerlatseqqinneruvoq imarisamigullu allannguuteqanngilaq.

Ilaasortap siunnersuutaa suliassaappat kommunalbestyrelsip oqartussaaffiginngisaanut tunngassuteqartoq imaluunniit siunnersuutip aalajangiivigineqarnissaa inatsisinik unioqquitsilluni aalajangiinerusussaappat kommunalbestyrelsi pisussaassaaq siunnersuutip oqaluuserineqarnissaa itigartitsissutigissallugu, kisianni siunnersuut kommunip suleriaasissaa naaportorlugu piffissaq eqqorlugu saqqummiunneqarsimappat oqaluuserisassanut ilanngunneqarnissaa borgmesterip itigartissinnaanngilaa.

Erseqqissarneqarpoq kommunimi ataatsimiititaliat nammineerlutik oqartussaaffeqartinneqanngitsut, tamanna inatsisiliornermi erseqqissumik aalajangersarneqarsimatinnagu.

Aalajangiisinnaatitaanermik piginnaatitaaffik kommunalbestyrelsimiippoq, taamaalillunilu ataatsimiititaliani nammineerluni aalajangiisinnaaffeqassappat tamanna inatsisitigut toqqammaveqartariaqarpoq.

§ 14-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 14-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersagaq isigineqassaq pisortat ingerlatsinerat pillugu Inatsisartut inatsisaannut suliassani aalajangersimasuni soqutigisaqarneq pissutigalugu aalajangeeqataasinnaannginnermut pissutissaatitaasussanik aalajangersaaffiusumut atatillugu. Ilaasortat ilaata suliassamut attuumassuteqarnera pissutaalluni aalajangeeqataasinnaannginneranik aalajangiineq amerlanerussuteqarnikkut aalajangerneqartassaaq.

Siunnersuummi matumani ilaasortap suliassamut attuumassuteqarnera pissutaalluni aalajangeeqataasinnaannginneranik aalajangiinissami periusissat taamaallaat pineqarput.

Ilaasortat ilaata soqutigisaqarnini pissutigalugu aalajangeeqataasinnaannginnissaa pillugu apeqqut nakkutilliisutut oqartussaasut misilitassaraat, inaarutaasumilli aalajangiinnissaq eqqartuussisuniippoq nakkutilliisutut oqartussaasunut killilersuutitut pituttorsimannigsumi, tak. siunnersuutip § 57-a. Naalakkersuisut pisinnaatitaanngillat kommunalbestyrelsip suliamik ingerlatsinera naapertuunnersoq pillugu naliliissallutik, imaluunniit tamanna eqqortumik ingerlatseriaaseqarneq tunngavigalugu ingerlanneqarnersoq nalilissallugu, soorluttaaq kommunit aalajangiineranik atorunnaarsitsisinnaanermut Naalakkersuisut periarfissaannik killiliiffigineqartut.

Soqutigisaqarneq pissutigalugu aalajangeeqataasinnaannginnermut maleruagassanik nalinginnaasunik siunnersuut imaqanngilaq. Suliassamut soqutigisaqarneq pissutigalugu nalinginnaasumik aalajangeeqataannginnissamut tunngavissaqarnersoq pisuni

ataasiakkaartuni pisortat maleruagassaataat nalinginnaasut naapertorlugit aalajangiisoqartassaaq.

Imm. 2-mut

Aalajangersakkami aalajangiunneqarpoq suliassamut soqutigisaqarneq pissutigalugu aalajangiisinnaanngitsoqarneranik pasinartoqartillugu kommunalbestyrelsimut ilaasortap nammineerluni nalunaaruteqarnissamik pisussaaffeqarnera.

Imm. 3-mut

Aalajangersakkap siunertaraa qulakkeerneqassasoq kommunalbestyrelsimi naalackersuinikkut oqartussaanerup nikisinneqannginnissaa ilaasortat ilaata suliassamut soqutigisaqarnini pissutigalugu aalajangeeqataasinnaatitaanngitsutut aalajangerneqarneratigut.

Ilaasortat ilaat suliassamut soqutigisaqarnini pissutigalugu aalajangeeqataasinnaatitaannginnerup saniatigut allamik peqquteqarluni najuutinngippat sinniisussap aggersarneqarnissaa pillugu apeqqut aalajangiiffigineqassaaq § 15 malillugu, ilaasortaq najuutinngitsoq suliassamut soqutigisaqarnini pissutigalugu aalajangeeqataasinnaatitaanngitsutut oqaatigineqassagaluarpuunniit.

Imm. 4-mut

Aalajangersakkami siunertaavoq qulakkeerneqassasoq, aalajangeeqataasinnaannginneq pissutigalugu sinniisussap aggersarneqarnissaa pillugu maleruagassat atornerlunneqannginnissaat, suliassami kommunalbestyrelsimi amerlanerussuteqarluartut aalajangiiviginiagaata aalajangiivigineqarnissaa pinngitsoortinniarlugu imaluunniit inatsisiliornerup imaluunniit isumaqatigiissutit inatsisitigut pisussaaffeqarfusut pissutissaqartippassuk piffissap aalajangersimasup iluani aalajangiisoqarnissaa.

Taamaattorli suliassap suliarineqarnissaata kinguartinneqarnissaa pisortat imaluunniit namminersortut soqutigisaannut annertuumik ajoqutaassappat ilaasortaq suliassamut soqutigisaqarnini pissutigalugu aalajangeeqataasinnaatitaanngitsoq suliassap oqaluuserineqarnerani peqataatinneqarsinnaavoq kommunalbestyrelsi aalajangiisinnaajunnaassanngippat, tak. pisortat ingerlatsineranni suliassat suliarineqartarnerat pillugu Inatsisartut inatsisaat § 4, imm. 2.

§ 15-imut

Imm. 1-imut

Aalajangersakkami pineqarpoq ilaasortap ataatsimiinnermut ataatsimut najuutinnginnissamut pisinnaatitaanera aamma sinniisussap ataatsimiinnermut ataatsimiigiaqquneqarsinnaanera.

Suleqatigiit ilaasortamik qinigaasitsisimasut piumasaqaateqarsinnaapput sinniisussap ataatsimiinnissamut ataatsimut ataatsimiigiaqqusinissamut. Tamatumani apeqqutaanngilaq suleqatigiit pineqartut kingusinnerusukkut atorunnaarsinneqarsimanersut imaluunniit allanngortinneqarsimanersut, tassa qinigaqaatigiissimasut akornanni sinniisussap

ataatsimiigiaqquneqarnissaanik piunasaqaateqarnissaq isumaqatigiinnigissutaalissappat tamanna aalajangiivigineqartariaqarmat amerlanerussuteqartut aalajangiinnerisigut.

Borgmesterip ataatsimiinnissamut nalinginnaasumik piareersaaneranut atatillugu ingerlaannartumik sinniisussamik aggersaasoqarneq ajorpoq. Tamatuma kinguneraa, kommunalbestyrelsimi ataatsimiinnissat piffissaalluartaillugu suleqatigiit pilersaarusiortarnissaq sillimaffigisariaqaraat.

Naqissuserneqassaaq inissitsitissalluni ataatsimiinnissamut aamma kommunip missingersuusiaasa aappassaaneerlugit oqaluuserineqarnissaanut sinniisussamik aggersaatitsinissamik piunasaqaateqartoqarsinnaammat, naak peqataasinnaanginneq taaneqartunik peqquteqanngikkaluartoq, kisiannili assersuutigalugu kommunalbestyrelsimi ilaasortaq angallanneq pissutigalugu anngussinnaanginnera pissutigalugu.

Tamanna pissuteqarpoq ataatsimiinnerni taakkunani pingaarutilerujussuarnik aalajangiivigisaqartarneq, taamaattumillu ilaasortap ataatsip najuutinnginneranik pissuteqartumik sunnerneqartariaqanngitsumik.

Imm. 2-mut

Aalajangersagaq siornatigut inatsimmut atuuttumut naleqqiullugu allanngortinneqarpoq. Inatsisartut inatsisaanni nutaami ilaasortaq kommunalbestyrelsimiit qaammatinik marlunnik sivilisunerusumik aningallarnissamik naatsorsuuteqartoq borgmesterimut allagakkatigut qinnuteqaammik nassiussaqaarnissaanik pisussaaffeqartoq atortuulersinneqarpoq. Ilaasortap aninissani pisariaqartoq siumut takusinnaangoruniuk sapinngisamik piaartumik borgmesterimut qinnuteqaat nassiutissavaa.

Ilaasortap borgmesterimik ataatsimeeqataasinnaanginnerminik nalunaaruteqarnissaanik peqquneqarnerata allannguutissami siunnersuutigineqartumi borgmesterip sukkanerpaamik ilisimatinneqarnermigut taava sinniisussaaq ataatsimiigiaqquneqarsinnaangortippaa.

Aalajangersagaq peqqusivoq pissutissaqavilluni sivikinnerpaamik qaammatini marlunnik sivilisussuseqartumik peqataasinnaanginnermi sinniisussamik ingerlaannartumik ataatsimiigiaqqusisinnissamik. Aalajangersagaq atuutilersinneqarnikuvoq sinniisussanik ataatsimiigiaqqusisarnermi periutsit eqaannerulersinniarlugit paasinarsigaangat pissutissaqavilluni kommunalbestyrelsimi ilaasortatut isumagisassat piffissami sivilisungaatsiartumi sivikinnerpaamillu qaammatini marlunni, imaluunniit agguaqatigiisillugu kommunalbestyrelsip ileqquusumik ataatsimiinnerini marlunni, sivilisussuseqartussaasumik peqataaffigineqarsinnaangippata.

Maleruagassarli isigineqassanngilaq kommunalbestyrelsimi ilaasortat sulinnigiffeqarallernermut assingusumik najuutinnginnissaminnut nalunaaruteqarnissaannut nalinginnaasumik tunngavissatut, tamannami kommunalbestyrelsimi ilaasortatut inuiaqatigiinni sullissisuuneranumut akerliummat. Piffissami pissutissaqavilluni ataannartumillu najuussinnaangikkallarneq peqqutaasariaqarpoq. Assersuutigalugu piffissap ingerlanerani ilaasortaq ataatsimiititaliat ataatsimiinneranni najuuttarsinnaaguni kommunalbestyrelsip ataatsimiinnerini ataatsimeeqataangitsoortarnissaanut pissutissaqanngilaq.

Akornutigisap pigallartuunera aalajangiisuunngilaq, tassami piffissap qinigaaffiup sinnerani ataatsimeeqataanngitsoortarnissap assigiinnassammagu ilaasortap kommunalbestyrelsimiit tunuarnissaata akuerineqarnissaa, tassalu:

1. sinniisussap kommunalbestyrelsimi ilaasortanngortinneqarnissaa
2. ilaasortap najuutinngitsup qinigaaqatigisimasaasa ataatsimiititaliani inissat inuttaqanngitsut inuttalissagaat.

Ilaasortaq kommunimi najukkaminiit nuukkallarpat kommuninut qinersisarnerni inatsimmi kommunalbestyrelsimiit tunuarnissaq pillugu maleruagassat malinneqartussaapput.

Imm. 3-mut

Kommunalbestyrelsimi suleqatigiit piunasaqarnerisigut imm. 1 naapertorlugu, imaluunniit borgmesterip imm. 2 naapertorlugu sulissuteqarneratigut sinniisussamik ataatsimiigiaqqusineqaraluarpuunniit kommunalbestyrelsi pisussaavoq aalajangiivigissallugu sinniisussap ataatsimiigiaqquneqarnissaanut piunasaqaataasut naammassineqarsimanersut isummerfigissallugu. Pingaartumik pineqarput ilaasortap kingoraarneqartup najuutinngikkallarnissaanut pissutaasut tunngavissaqarnerisut imaluunniit sinniisussaq aggersarneqarsimanngippat tamanna pisariaqarnerisooq.

Kommunalbestyrelsip aalajangiinera nakkutilliisutut oqartussaasunit misilinneqarsinnaatitaavoq, pisariaqartinneqarsimappallu eqqartuussivinnut ingerlateqqinneqarsinnaalluni.

Imm. 4-mut

Aalajangersakkap naqissuserpaa, sinniisussaq kommunalbestyrelsimi ilaasortap piffissami atorfissarisaminit pisinnaannginnerani taamaallaat atuuffeqassasoq.

Imm. 5-imut

Borgmesteritut qinigaasup piffissami sivisunerusumi peqannginnissaani kiap borgmesteritut atuunnissaa pillugu apeqqummi kommunalbestyrelsip pituttorsimanani aalajangiisinnaanissaa siunnerfigalugu aalajangersagaq ilanngunneqarpoq. Borgmesterip isumagisassaanik borgmesterip tulliata tiguisinnaanera, tak. § 22, taamaallaat pineqarpoq borgmesterip pisinnaanngikkallarnera qaammatinik sisamanik taakkuluunniit inorlugit sivisussuseqartussaasutut nalileneqarpat.

Borgmesterimik nutaamik matumani aalajangersagaq malillugu qinersisoqarsimanngippat, borgmesterimik qinersisoqassanngilaq borgmesterip najuutinngikkallarnera qaammatinik sisamanik sivisunerusumik sivisussuseqaraluarpuunniit. Taamaattumik borgmesterimik nutaamik aatsaat qinersisoqassaaq kommunalbestyrelsip siunmoortumik nalilerpagu borgmesteri piffissamit tassannga sivisunerusumik peqassanngitsoq.

Malittarisassaq manna malillugu borgmesterimik nutaamik qinersisoqarsimappat taanna borgmesterip najuutinngikkallarfiisaanut tamarmiusumut qinigaassaaq, taamaattumillu tunuartinneqarsinnaassanani, § 23-mi piunasaqaataasut naammassineqarsimanngippata.

§ 16-imut

Imm. 1-imut

Aalajangersagaq allangortinneqassasoq siunnersuutigineqarpoq piunasaqaat ataatsimiinnermi aalajangikkanut imaqarniliap ilaasortanit najuuttunit ataatsimiinerup kinguninnguutigut erngertumik atsiorneqarnissaa peerlugu kiisalu eqaannerusumik aaqiisoqassasoq, aalajangikkanut imaqarniliaq ilaasortanit najuuttunit ataatsimeereernerup kingorna atsiorneqartarnissaanik.

Taamatut siunnersuuteqarnermut tunngavilersuutaavoq ajornakusoortarmat ilaasortap ataatsip arlallilluunniit oqarasuaat imaluunniit "videokonference" atorlugu ataatsimeeqataasimasut, takuuk § 11, atsiorsinnaasernerat ataatsimeereernerup kinguninngua qulakkeerneqarsinnaasangimmat.

Allannguutissatut siunnersuummi qulakkeerneqassaaq ilaasortat IT atorlugu periarfissat atorlugit atsiorsinnaanissaa assersuutigalugu imaqarniliap assinga fax-ikkut atsiorsinnaallugu imaluunniit allatigut ilaasortap atsiornerata ilumuussusianik qulakkeerinnoq.

Aalajangersakkap naqissuserpaa immikkut isumallit imaqarniliamut ilanngunneqarsinnaasut.

Imm. 2-mut

Imaqarniliap ataatsimiinnerup kingorna atsiorneqarnissaa borgmesterip akisussaaffigivaa.

Imm. 3-mut

Aalajangersagaq nutaajuvoq ilaasortanullu attaveqaatitigut teknologi atorlugu ataatsimiinnermi peqataasunut tunngasuulluni, tak. § 11, imm. 2. Aalajangersakkami 2006-imi inatsisip allangortinnerata kingorna suleriaaseq ineriartorsimasoq aalajangersarneqarpoq, taamani periarfissiissoqarmat ilaasortat tele aqutugalugu ataatsimiinnermi peqataasinnaasut. Assersuutigalugu aalajangiinnermi imaqarniliaq ataatsimiinnermi peqataasumut najuutinnigsumulli faxerlugu imaluunniit allatut isumannaatsumik nassiunneqarsinnaavoq. Kommunalbestyrelsimut ilaasortap aalajangiinnermut imaqarniliaq tamatuma kingorna atsioriarlugu borgmesterimut utertillugu nassiutissavaa.

Imm. 4-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 16, imm. 3-imik, § 16, imm. 4-nngorlugu ingerlatseqqinneruvoq imarisamigullu allannguuteqanngilaq.

Aalajangersakkami aalajangersarneqarpoq imaqarniliaq atsiorsimasoq kingusinnerpaamik qaammat ataaseq qaangiutsinnagu atsiorneqarnerata kingorna nakkutilliisutut oqartussanut nassiunneqassasoq.

§ 17-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 17-imik ingerlatseqqinneruvoq imarisamigullu allannguuteqanngilaq.

Kommunalbestyrelsip ataatsimiinnerinut piareersaassalluni aggersaassallunilu borgmesterip akisussaaffigivaa. Ataatsimiinnissamut piareersaaneq tassaavoq ullormut oqaluuserisassanik suliaqarneq aammalu kommunalbestyrelsimut ataatsimiinnermi suliassanik ataasiakkaanik paasissutissanik sularinninneq. Taamattaq borgmesterip pisussaaffigivaa isumaqatigiinniarnerni aamma taasinerit aqussallugit kiisalu aalajangiinerit imaqarniliamut ilanngunnissaat isumagissallugu.

§ 18-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 18-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersakkap naqissuserpaa borgmesteri suliari apeqquuserneqarsinnaanngitsuni aalajangiisinaasoq aammalu suliari kommunalbestyrelsip ataatsimiinnissaanut utaqqinneqarsinnaanngitsunik aalajangiisinaasoq. Piumasaqaataasoq taamaallaat naammassineqarsimassaaq, borgmesterip suliaq apeqquuserneqarsinnaanngitsutut isigippagu aammalu ilaasortat allat tamarmik suliap apeqquuserneqarsinnaanngitsutut isigineqassasoq nalilerpassuk. Naammassisassami aalajangersimasumi kommunalbestyrelsimi amerlanerussuteqartoqarnissaa qularnanngitsutut isigineqarpat borgmesterip nammineerluni suliaq aalajangiiffigisinaavaa amerlanerussuteqarneq qularutigineqanngippat.

Assersuutigalugu suliaq kinguartinneqarsinnaanngitsutut taaneqarsinnaavoq illoqarfimmi ikuallannersuarmik nalaataqarnissamik ernumanartoqarpat, taamaalillunilu ernertumik ikiorserneqarnissamik pisariaqartitsisoqarpat.

Suliani apeqquuserneqarsinnaanngitsuni assersuutigineqarsinnaavoq kommunalbestyrelsi assigisaani qanittukut aalajangiisimappat.

Imm. 2-mut

Aalajangersagaq pisortat ingerlatsineranni ammanerusumik ingerlatsisoqarnissaanik Naalakkersuisut kissaataata ilaattut ilanngunneqarpoq.

§ 19-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 19-imik ingerlatseqqinneruvoq, oqaasertai allannguuteqarput imarisamigullu allannguuteqanngilaq.

Imm. 1-imut

Kommunip allaffissornikkut ulluinnarni aqutsinera borgmesterimit ingerlanneqarpoq, borgmesterip akisussaaffigivaa kommunip suliassai naleqqunnerpaamik

naammasineqartassasut. Suliassat naammasineqarnissaat ingerlatsivinnut agguaataarneqarnissaat borgmesterip ingerlateqqissinnaavaa, kisiannili borgmesterip suliassat naammasineqarnissaat pingaarnertut akisussaaffigivaa.

Kommunimut suliassanik nutaanik takkuttoqarpat ataatsimiititaliamut attuumassuteqartumut aqutsinermut ileqqoreqqusaq naapertorlugu suliassa qarfiusumut qaninnerpaamut inissinneqassapput. Aqutsinermi ileqqoreqqusami suliassap inissinneqarnissaa nalornissutigineqartillugu kommunalbestyrelsi tamatumunnga aalajangiisariaqarpoq pisariaqarpallu aqutsinermi ileqqoreqqusami allanngortitsisariaqassaaq.

Imm. 2-mut

Aalajangersakkap naqissuserpaa borgmesterip akisussaaffigigaa aningaasaliissuteqartoqartinnagu aningaasartuuteqartoqassanngitsoq imaluunniit isertitaqartoqarsimassanngitsoq. Aningaasaliissut tassaavoq ukiumut missingersuummi aningaasartuutissatut aalajangiunneqarsimasoq.

§ 20-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 20-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersakkap naqissuserpaa borgmesteri kommunip allaffissornikkut qullersatut akisussaasutut ataatsimiititaliani tamani ataatsimiinnerni peqataasinnaatitaasoq. Aalajangersakkap taamatuttaaq naqissuserpaa, ataatsimiititaliani ataatsimiinnermut ullormi oqaluuserisassanik aammattaaq imaqarnilianik borgmesteri nassinneqartassasoq. Aalajangersagaq aammattaaq ima isigineqassaaq kommunimi aalajangiinnerni nalinginnaasumik annertunerusumik paasisitsisoqartarnissaanik kissaateqarnermik.

Borgmesterip ataatsimiititaliani ataavartuni ataatsimiinnermi peqataasarnissaata avataatigut aammattaaq ataatsimiititaliaagallartuni aammalu siunnersuisoqatigiinni ataatsimiititaliani peqataasarnissaanut ilaavoq.

Imm. 2-mut

Aalajangersakkap naqissuserpaa, borgmesteri kommunip allaffissorneranut qullersatut inissisimanermigut ataqatigiissaarinnermik atuuffeqartoq. Aalajangersagaq siunnersuutigineqartumut § 29, imm. 2-mut ataatsimiititaliat suliani attuumassuteqartuni ataatsimiititaliat allat aalajangersinnaassuseqarfiini attuumassuteqartunut isumasioqatigiittussaataitanerannut ilaasutut isigineqassaaq.

Imm. 3-mut

Aalajangersagaq kommunip ingerlanneqarneranut atatillugu borgmesterip ataqatigiissaarisinnaaneranik nukittorsaanermut atavoq. Borgmesteri akuliussinnaavoq suliani

ataatsimiititaliani suliarineqartuni sulianilu allaffissornikkut suliarineqartuni. Pineqartumi kingullermi kommunalbestyrelsimut saqqummiussineq pisassaaq ataatsimiititaliaq attuumassuteqartoq aqputigalugu, pisariaqarpallu suliaq kommunimut aningaasatigut kinguneqartussaattillugu aningaasaqarnermut ataatsimiititaliaq aqputigalugu.

Akuliussinnaanermut pisinnaatitaaffiup atorneqarnera annertunerusumik tunngavilersortariaqanngilaq, taamaallaalli borgmesteri isummersimassaaq kommunalbestyrelsi suliamut isummertussaanera pissusissamisuussasoq. Akuliussinnaanermut pisinnaatitaaffik assersuutigalugu atorneqarsinnaavoq suliaq tunngaviatigut isummernissamik ima imaqartigippat borgmesteri isumaqarpat suliarineqartoq kommunalbestyrelsimut isummerfigitittariaqarsoralugu imaluunniit aamma ataatsimiititaliap aalajangerera borgmesterip isumaqatiginngippagu.

Ataatsimiititaliap aalajangiuppagu suliaq borgmesterip akuliuffigisimasaa ingerlateqqinniarnagu, taava kommunalbestyrelsimut saqqummiussisussaataaneq ataatsimiititaliap pisussaaffigisaa atorunnaassaaq. Tamatumani akornusissanngilaa kommunalbestyrelsimi ilaasortat suliamik kommunalbestyrelsimut saqqummiusisinaanerat, tak. § 13.

§ 21-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 21-imik ingerlatseqqinneruvoq imarisamigullu allannguuteqanngilaq.

Kommunip taaneqartuni iliuusaata inatsisitigut atorsinnaatitaaffiunut tunngasunut attuumassuteqanngilaq, kisiannili qanoq iliornissamut aalajangersagaalluni, kommunip suut qanorlu toqqammavigalugit tiguisinnaatitaanera akiliisinnaatitaaneranut aalajangersagaalluni, tamakkunatigut qanoq ingerlanneqartarneri apeqqutigineqartarsimammat, minnerunngitsumik aningaaserivinninngaaniit aammalu allagartat kommunit illuutaannut tunngasuni nalunaarsortarnerannut atasuni.

Inuk alla allagartanik inatsimmi aalajangersakkami taaneqartunik atsiortussaq pisariaqanngilaq kommunalbestyrelsimut ilaasortaasariaqartoq kommunimiluunniit atorfeqartariaqartoq, taannali pineqartoq taamaallaat isumaqatigiissuteqarsinnaasussaassaaq nammineersinnaanermut iliuuseqarsinnaanermullu piumasarisat nalinginnaasut naammassisimagunigit.

Inuit atsiortut kinaassusiannut uppernarsaatit uppernarsaatit takuneqarsinnaassapput kommunalbestyrelsip aalajangiinermi imaqarniliaani.

§ 22-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 22-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersagaq borgmesterip tulliata sulineranut atatillugu maleruagassanut aalajangersaavoq.

Aalajangersakkami aalajangiiffigineqanngilaq qanoq pisoqartillugu borgmesteri tunuarallartassasoq, tamatumani pisut ataasiakkaat aalajangersimasut naliliiffigineri aallaaviusassammat. Borgmesterip aalajangertassavaa pineqartup suliassani qanoq ilinikkut suliarisinnaanngikkai.

Kommunalbestyrelsip ataatsimiinnerini borgmesterip borgmesterip tullia kissaatigisinnaavaa ataatsimiinneq aqoqullugu borgmesterip oqarasuaatikkut imaluunniit videokkut isiginnaarutikkut ataatsimiinneq aqukkusunngippagu, tak. § 11, imm. 2.

Imm. 2-mut

Aalajangersakkami erseqqissarniarneqarpoq borgmesterip qaammatisiummi ulluni ikinnerpaamik 21-ni borgmesteritut suliassani ingerlassinnaanngippagit kommunalbestyrelsip borgmesterip tullia pisussaaffilersinnaagaa borgmesterip suliaanik tamanik tigusinissaanik, allaffeqarfimmi aqutsineq taamalu aningaasaqarnermut ataatsimiititaliamut siulittaasuuneq ilanngullugit, taamalu pisoqartassalluni borgmesterip nammineq borgmesterip tullia qinnuvigisimannngippagu suliari tigoqqullugit.

§ 23-imut

Aalajangersagaq maanna kommunit aquneqarnerat pillugu Inatsisartut inatsisaat nr. 14, 5. december 2008-meersumi atuuttumit § 23-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut

Aalajangersakkami pineqarpoq suliassamik ataatsimik imaluunniit suliassat ikitsunnguusunik killeqartunillu borgmesteri suliarinngikkusussanngippat. Taama pisoqarsinnaanera akuerineqarsinnaanngilaq, borgmesteri aalajangersimasumik akissarsiaqartinneqarpat, tunuartinneqarsinnaanani. Aalajangersakkami borgmesterimut suliassaminik naammassinnikkusunngitsumut kommunalbestyrelsi immikkut akuliussinnaaneranut periarfissiivoq.

Imm. 2-mut

Borgmesterimik tunuartsigallarneq immaqalu kingusinnerusukkut soraarsitsineq aatsaat pisinnaavoq borgmesteri annertuumik imaluunniit arlaleriarluni suliassaminik naammassinnikkusunngippat. Annertuumik imaluunniit arlaleriarluni suliassanik naammassinninngikkusunnginneq ima paasineqassaaq, piunasaqaatit taakkua marluullutik ataatsikkut naammassineqarsimasut tunuartsigallarneq kingusinnerusukkullu soraarsitsinermik kinguneqartoqassappat. Soorunami pisuni ataasiakkaani nalilersuisoqassaaq, naammassinninngikkusunneq qanoq annertutigissanersoq, tunuartsigallarnermik kinguneqartariaqarluni. Taamattaq naammassinninngikkusunneq annikinnerusoq kisiannili

arlaleriarlugu naammassineqarusunngippat taamatut pisuni ataasiakkaani nalilersuereernikkut tunuartitsigallarnermik aammalu soraarsitsineramik kinguneqarsinnaanera naammassaaq.

Imm. 3-mut

Aalajangersakkami aalajangerneqarpoq tunuartitsigallarnermik aalajangernermi Naalakkersuisut tunuartitsigallarnermik aalajangerneq misilissagaat taamalu misissussallugu eqqortumik aalajangersimaneq tunngaveqarnersoq.

Imm. 4-mut

Soraarsitsineramik aalajangiineq eqqartuussisunut ingerlateqqinneqarsinnaanngilaq. Tamatumani kommunimi patajaatsumik aqutsisoqarnissaa qulakkeerniarlugu pivoq. Akissarsiaqarnermik apeqqutit § 67, imm. 2-mi aalajangersarsimapput.

§ 24-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 24-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersakkap naqissuserpaa kommunalbestyrelsi aningaasaqarnermi ataatsimiititaliamik pilersitsissasoq.

Imm. 2-mut

Aalajangersakkap naqissuserpaa borgmesteri aningaasaqarnermi ataatsimiititaliamut siulittaasuussasoq.

Imm. 3-mut

Aalajangersakkap naqissuserpaa aningaasaqarnermi ataatsimiititaliami 2-mik agguarneqarsinnaanngitsumik qinersisoqassasoq. Aammattaaq aningaasaqarnermi ataatsimiititaliap ilaasortaasa amerlassusaat kommunalbestyrelsimi ilaasortat amerlassusaata affaat qaangissanngilaat. Taamattaaq kommunalbestyrelsi aningaasaqarnermi ataatsimiititaliap ilaasortaannut sinniissussanik qinersissapput.

Imm. 4-mut

Aalajangersakkami pineqarpoq aningaasaqarnermi ataatsimiititaliamut inunnik toqqaanissamik piginnaatitsissummik inerteqquteqarneq, kommunalbestyrelsi imaluunniit aqutsinissamik ileqqoreqqusap avataani aalajangersakkat naapertorlugit sinniisoqartussaananeranut tunngatillugu. Akerlianik § 31, imm. 3-mi taaneqartut immikkut ataatsimiititaliat, aningaasaqarnermi ataatsimiititaliamut qinikkat kommunalbestyrelsimi ilaasortaasussaapput, tamanna peqquteqarpoq ataatsimiititaliaq inatsit naapertorlugu kommunalbestyrelsi sinnerlugu aalajangernissamik piginnaatitaammat, akerlianillu immikkut

ataatsimiititaliat taamaallaat killilimmik piginnaatitaaffeqarmata sulianut aalajangersimasunut atatillugu imaluunniit kommunalbestyrelsimut, aningaasaqarnermi ataatsimiititaliamut imaluunniit ataatsimiititalianut ataavartunut piareersaanernik suliaqartarmata imaluunniit siunnersuineramik ingerlatsisarmata.

Aalajangersakkap naggataata ersarissarpaa, ataatsimiititalianut inunnik qinersinerni kommunalbestyrelsi toqqaasinnaangitsoq qinigaanerit kommunalbestyrelsip atuuffianit sivikinnerusumik atuuffeqartussanik.

§ 25-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 25-mik ingerlatseqqinneruvoq imarisamigullu allannguuteqanngilaq.

Imm. 1-imut

Inatsisartut inatsisaat naapertorlugu aningaasaqarnermi ataatsimiititaliaq taamaallaat inatsisitigut pilersinneqarnissaa piumasagaataammat, aningaasaqarnermi ataatsimiititaliap suliassai inatsisartut inatsisaanni toqqaannartumik allassimanissaat eqqortuunerussasoq nalilerneqarpoq, aqutsinermik ileqqoreqqusanilu allassimassanatik.

Aalajangersakkap qulakkeerpaa aningaasaqarnermi ataatsimiititaliaq ataqatigiissaarinnissaq eqqarsaatigalugu piginnaassutsinik sakkortuunik piginnaatitaassasoq, taamaalilluni immikkoortualukkaartumik aqutsisoqalinnginnissamik ineriartortoqalernissaa pinngitsoorumallugu. Pingaaruteqarpoq aningaasaqarnermi ataatsimiititaliami aamma kommunalbestyrelsimi kommunip suliassaani amerlasuuni tamakkerlugu isiginninnermik qulakkeerisoqassasoq taamaalilluni suliassat pimoorussamik tulleriarsinnaanerinek periarfissaqarsinnaaqqullugu.

Nr. 1 pillugu: Aalajangersakkap naqissuserpaa aningaasaqarnermi ataatsimiititaliaq ataqatigiissarisutut ingerlatsiviusoq aammalu naqissuserlugu aningaasaqarnermi ataatsimiititaliap oqaaseqaatai aningaasaqarnermi suliani tamani aamma allaffissornermi suliani piniarneqartassasut tamakkua kommunalbestyrelsip aalajangiunneqarnissaanut saqqummiunneqartinnagit.

Nr. 2 pillugu: Aalajangersagaq ilaatigut kommunit ingerlatsinerannik atuuttumik naqissuseqqiineruvoq, ilaatigullu kommunip aqunneqarnerani kommunaldirektøritut atorfik qanoq pingaaruteqartigineramik erseqqissaassutaalluni.

Nr. 3 pillugu: Aalajangersakkap naqissuserpaa aningaasaqarnermi ataatsimiititaliaq kommunip suliassaani tamani karseqarnermut aamma naatsorsuuserinnermut attuumassutilinnut suliassanut tamanut akisussaasuusoq aammalu Naalakkersuisut konto-t ingerlannerinik maleruagassanik atuuttuni aalajangersagaanni eqqortitsinissap qulakkeerneqarnissaa ilanngullugu.

Nr. 4 pillugu: Aalajangersakkap erseqqissarpaa aningaasaqarnermi ataatsimiititaliap aningaasaqarnermut aammalu immikkoortukkuutaani pilersaarusiornermut atatillugu pilersaarusiornissamut suliassai. Aningaasaqarnermi ataatsimiititaliaq aammattaq pineqartuni nalinginnaasumik maleruagassanik aalajangiissasoq pisussaaffilerneqarpoq. Maleruagassat ataatsimiititalianut tamanut aalajangiinerinut pituttuisuupput.

Nr. 5 pillugu: Aningaasaqarnermut ataatsimiititaliaq peqquneqassaaq nalinginnaasumik ileqqoreqqusanik aalajangersaaqqullugu. Ileqqoreqqusat pilersinneqartut ataatsimiititaliat allat aalajangiinerinni pinngitsooratik malittarisassavaat.

Imm.2-mut

Aalajangersakkami aalajangersarneqarpoq aningaasaqarnermut ataatsimiititaliap piginnaatitaaffii annertusineqarsinnaasut aamma ingerlatsiviit allat oqartussaaffii ilaaterlugit. Kommunalbestyrelsi aqutsinermik ileqqoreqqusani aalajangiisinnaavoq assersuutigalugu inuussutissarsiornermut suliassat tunngassuteqartut aningaasaqarnermi ataatsimiititaliami ingerlanneqarsinnaasut. Ingerlatseriaaseq tamanna kommunalbestyrelsip qinerpagu ataatsimiititaliaq taagorneqassaaq inuussutissarsiornermut aamma aningaasaqarnermut ataatsimiititaliaq.

Imm. 3-mut

Aalajangersagaq kommunimut missingersuusiornermi suliaqarnermut annertuumik pingaaruteqarmat siunertaralugulu kommunalbestyrelsimi ilaasortat aningaasaqarnermi ataatsimiititaliami ilaasortaangitsut missingersuutit suliarineqarnerannut pitsaanerusumik apeqqutinut paasisaqarsinnaaqullugit.

§ 26-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 26-imik ingerlatseqqinneruvoq imarisamigullu allannguuteqanngilaq.

Imm. 1-imut

Aalajangersakkami aalajangerneqarpoq kommunit nammineerlutik ataatsimiititaliat aaqqissuuneqarnerannik pilersaarusiussasut suliat naammassineqarnissaannut immikkut inatsiseqarnermi piunasaqaataasut naapertorlugit.

Aalajangersakkap kinguneranik aqutsinermi ileqqoreqqusaq nalinginnaasoq ataatsimiititaliat ataavartut taakkualu suliassaannik malittarisassanik ataasiakkaanik imaqanngilaq, kisiannili Naalakkersuisut nakkutilliisutut oqartussatut aqutsinermik ileqqoreqqusat kommunini ataasiakkaani immikkut inatsiseqarneq naapertorlugu pisussaaffiit akerliunersut misissorsinnaassavaat.

Imm. 2-mut

Aalajangersakkami siunertarineqarpoq erseqqissarneqassasoq ataatsimiititalianik ataavartunik ilaasortat qinerneqartut amerlassusiat akunnattumik amerlassuseqassasut. Aammattaaq ataatsimiititaliani ataavartuni ilaasortat amerlassusiat kommunalbestyrelsimi ilaasortat affaat sinnerlugit amerlassuseqassanngillat. Aammattaaq kommunalbestyrelsi aningaasaqarnermi ataatsimiititaliami ilaasortat sinniisussaannik qinersissaaq. § 37-ip aalajangersarpaa qaqugu sinniisussamik aggersaasoqartassasoq.

Imm. 3-mut

Aalajangersakkami aalajangerneqarpoq ataatsimiititaliani ataavartunut qinersineq aningaasaqarnermi ataatsimiititaliamik qinersinerup kingorna pissasoq. Aalajangersakkap naggataatungaani aalajangerneqarpoq kommunalbestyrelsi ataatsimiititalianut inunnik qinersinermi aalajangiisoqarsinnaanngitsoq, qinersinerit kommunalbestyrelsip atuuffiata naannerusumik atuuttussamik.

§ 27-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 27-mik ingerlatseqqinneruvoq imarisamigullu allannguuteqanngilaq.

Imm. 1-imut

Inatsimmi atuuttumi amerlanerussuteqarluni qinersinermi aalajangersagaq maanna inatsisissatut siunnersuummi § 36, imm. 1-mi allassimavoq. Ataatsimiititaliani ataavartuni ilaasortaasut tamarmik ataatsimiititaliami siulittaasutut qinerneqarsinnaanermik pisussaaffeqarput. Ataatsimiititaliami ataavartuni ilaasortaaneq ilaasortaaneq sanilliullugu siulittaasooq kommunalbestyrelsip atuuffianut tamarmut qinerneqarneq ajorpoq, taamaalillunilu amerlanerussuteqarluni qinersinikkut ataatsimiititaliami ataavartuni taarserneqarsinnaassalluni.

Imm. 2-mut

Aalajangersakkap siunertaraa ataatsimiititaliap sulinera eqaannerusumik ingerlanneqarsinnaaqullugu, minnerunngitsumik ataatsimiititalianut ataatsimiinnissamik aggersaaneq ilaatigut ajornartorsiuteqarfiusinnaammat, assersuutigalugu ataatsimiititaliamik ilaasortat nunaqarfimmi najugaqarpata.

Aalajangersakkami naqissuserneqarpoq ataatsimiititaliap siulittaasuata sulianik aalajangiisinaanera, ataatsimiititaliamut ataavartumut saqqummiunneqartussaagaluartumut. Ataatsimiititaliami ataavartumi siulittaasooq kommunip allaffissornerata ilaanut ulluinnarni aqutsisutut assersuuneqanngilaq taamaalillunilu aalajangersakkap ataavartumik ataatsimiititaliap piginnaatitaaffiata aammalu borgmesterip allaffissornermi ulluinnarni aqutsisuatut pisinnaatitaaffiisa killiinik allanngortitsinngilaq.

Ataatsimiititaliap ataavartup siulittaasua sulianik nukinginnartunik aammalu suliani apeqquserneqarsinnaanngitsuni aalajangiisinnaanermik piginnaatitaaffiup avataatigut tunineqarusuppat, tamanna ataatsimiititaliap ilaasortat tamarmik isumaqatigiissutigippassuk pisinnaavoq.

Suliani oqariaatsip "apeqquserneqarsinnaanngitsoq" nassuiarneqarnerani piumasaqaataavoq, ataatsimiititaliap siulittaasuata nalilissagaa, ataatsimiititaliami ilaasortat tamarmik, tassalu amerlanerussuteqartuinnaanngitsut suliaq apeqquserneqarsinnaanngitsutut isigissagaat.

Aalajangersagaq suliassani nukinginnartuni pisoqartillugu borgmesterimut ilisimatitsisussaataaneq toqqammaveqarpoq borgmesterip ataqatigiissaarinnissamut periarfissinneqassammat aammalu ataatsimiititaliap ataavartup ingerlatsineranut borgmesterip akuliunnissaanut pisinnaatitaaffeqarneranik toqqammaveqarpoq. Ataatsimiititaliami siulittaasoq inatsit naapertorlugu pisinnaatitaaffeqarpat borgmesteri siumoortumik nalunaarfigineqassanngilaq.

Imm. 3-mut

Aalajangersakkap ersarissarpaa siulittaasutut immikkut piginnaatitaaffiit ataatsimiititaliat aqunneqarneri toqqammaviatigut allanngortinneqanngitsut. Taamaalillunilu siulittaasoq ataavartumik ataatsimiititaliat aalajangiinerannik malinnaasussaavoq.

Ataatsimiititaliamut atatillugu siulittaasup suliassarai ataatsimiinnerit piareersarneri, ataatsimiinnerni aggersaaneq, ataatsimiinnerni aqutsineq il.il.

§ 28-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 28-mik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut

Aalajangersakkap naqissuserpaa ataatsimiititaliat sulinerat ataatsimiinnerni ingerlanneqassasoq. Aalajangersagaq ersarissaataavoq, ataatsimiititaliaq ataavartuq kommunalbestyrelsi assigalugu ataatsimeeqatigiisititut aaqqissuussaasoq. Tele atorlugu attaveqaatinik teknologi atorlugu aalajangersakkanik peqartoqanngilaq taamaattumillu pisut ataasiakkaat naapertorlugit kommunalbestyrelsi naliliisassaaq suut tele-kkut attaveqaatigut teknologi atorneqartassanersut.

Imm. 2-mut

Suleriaasissamik maleruagassaartoqarnissaanik piumasaqaat ima isumaqanngilaq kommunalbestyrelsip suleriaasissatut maleruagassaata assinganik allassimasumik suleriaaseqartoqassasoq. Aalajangersagaq salliutillugu isumaqarpoq, kommunalbestyrelsi pisinnaanngimmat ataatsimiititaliap ataavartup iliუსai pillugit suliassat ingerlanneqartarnissaannut maleruagassanik aalajangersaanissamut.

Imm. 3-mut

Aalajangersakkap naqissuserpaa nalinginnaasumik § 16-imut innersuussinikkut ikinnerussuteqartut pisussaaffiinik aammattaaq kommunalbestyrelsini imaqarnilianut tunngatillugu aamma ataatsimiititaliami atuuttusoq aammattaaq § 16-imut innersuussutip naqissuserpaa imaqarniliaq atsiorneqarneraniit kingusinnerpaamik qaammat ataaseq qaangiutsinnagu Naalackersuisunut assilineranik nassitsisoqassasoq.

Imm. 4-mut

Aalajangersakkap naqissuserpaa qaqugukkut ataatsimiititaliami ilaasortaangitsut ataatsimiititaliap ataatsimiinnerini najuussinnaatitaasut, tassami aallaaviummat ataatsimiititaliani ataatsimiinnerit matoqqasuuneri.

Aalajangersakkap ataatsimiititaliaq periarfissippaa ingerlatsisoqarfimmi ikiorsiinissamik piumasaqarsinnaalersillugu, kisiannili borgmesterip allaffissornermi ulluinnarni qullersatut aqutsisutut, pisariaqarpat ataatsimiititaliaq pineqartoq tusarniareerlugu aammalu ataatsimiititaliap siulittaasua oqaloqatigereerlugu, aalajangissallugu allatseqarnermi ikiorteqarnek sorleq ikiorsiissutaassanersoq aalajangissallugu. Ataatsimiititaliap ataavartup allatsitut toqqagaasup ataatsimiititaliap ataatsimiinnera peqataaffigissagaa kissaatiginnippagu, ataatsimiititaliap ataavartup tamanna akerlilersinnaavaa, taamaattorli borgmesterip tamanna akerlilerpagu allamik allatsimik toqqaasinnaangilaq. Ataatsimiititaliami ataavartumik borgmesterillu allatseqarnek pillugu isumaqatigiinningsutaasoq kommunalbestyrelsimit aalajangiiffigineqassaaq.

Aammalu kommunimi atorfilik kommunalbestyrelsimit ataatsimiititaliamut ataavartumut allatsitut toqqagaasoq, ataatsimiititaliami ataavartumit ataatsimiinnernut peqataanissaa akerlilersinnaavaa, kisiannili ataatsimiititaliap ataavartup kommunalbestyrelsi allatsissatut aalajangiinera malinnisnaanut pisussaataitaassaaq suli at ingerlatsivimmi sularineqarnerini ataatsimiititaliap ataavartup ataatsimiinnerisa aamma avataanni.

Ataatsimiititaliaq ataavartoq aamma atorfilinnik aggersaasinnaavoq paasissutissanik oqaatsitigut nassuiaassinissaaq imaluunniit assigisaanik tigusaqarnissaaq siunertaralugu.

Ataatsimiititaliaq ataavartoq ataatsimiititaliami ataavartumi allatsip avataatigut atorfilinnik allanik peqataasoqarnissaanik akuersissummik nalinginnaasumik tunisisinnaangilaq. Atorfillit ataatsimiititaliap ataatsimiinneranut paasissutissiissallutik aggersarneqartut ataatsimiinnerni pisussaataitaapput peqataassallutik, kommunalbestyrelsi imaluunniit borgmesteri allamik aalajangersimanngippat.

Aalajangersakkami aamma pineqarpoq atorfilittaangitsut ilaatigut kommunalbestyrelsimi ilaasortat allat ilanngullugit, ataatsimiititaliani peqataasinnaatitaaneri. Aalajangersakkap erseqqissarpaa inuit pineqartut taamaallaat ataatsimiititaliap ataatsimiinnerinut aggersarneqarsinnaasut suli aamma aalajangersimasumik paasissutissiinnaannik toqqammaveqarpat. Akerlianik kommunimi atorfilinnut, atorfeqartuunngitsut ataatsimiititaliat ataavartut isumaqatigiinniarneri najuuffigisinnaavaat taasisitsinerilli najuuffigisinnaanagit.

Aalajangersakkami anguniarneqarpoq ataatsimiititaliani ataatsimiinnerit sulisuunngitsuniit peqataaffigineqarnissaat killilersorneqassasoq minnerunngitsumik anguniarlugu ataatsimiititaliat ataatsimiinnerini ataatsimiititaliami ilaasortat kommunalbestyrelsimi

ilaasortaasut avataatigut peqataasannginnissaat, taamaalillugu isumaqatiginninniarnit kommunalbestyrelsip ataatsimiinnerini ammasuniit ataatsimiititaliami ataatsimiinnerni matoqqasuusunut nuunneqarnissaat ernumassutigineqarsinnaammat.

Imm. 5-imut

Aalajangersakkami pineqarpoq kommunit aalajangeeriaasaat aammanerulernissaannik kissaateqarneq tunulequtaralugu.

§ 29-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 29-mik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Aalajangersakkami aalajangerneqarpoq ukiumut missingersuummi akuerineqartumi killiliunneqartut iluanni ataatsimiititaliap ataavartup susassaqarfini pisussaaffigissagai. Aalajangersakkakut aammattaaq aalajangiunneqarpoq naqissuserlugu ukiumut missingersuummi akuerineqarsimasut sipporneqartussanngornerat ataatsimiititaliap paasippagu taava ilassutitut aningaasaliissutissanik pinngitsoorani qinnuteqartoqassasoq.

Imm. 2-mut:

Aalajangersakkakut aalajangerneqarpoq ataatsimiititaliaq ataavartoq ataatsimiititalianik attuumassuteqartunik isumaqatiginninniartassasoq, ilaatigut aningaasaqarnermut ataatsimiititaliamik, ataatsimiititalianik ataavartunik allanik aammalu ataatsimiititaliat allat aalajangiisoqartinnagu isumaqatigiinniartassagai. Pisariaqartillugu ataatsimiititaliap ataavartup isumaqatiginninniartoqartillugu pisariaqalerpat borgmesteri isumaqatiginninniarnerni ilanngutsissinnaavaa.

Imm. 3-mut:

Aalajangersakkakut aalajangerneqarpoq tamanna kissaatigineqaraangat ukiumut missingersuutitut aammalu missingersuusianut siunnersuutitut ataatsimiititaliaq ataavartoq ilanngussisassasoq. Ataatsimiititaliaq ataavartoq ilanngussaqaarnissaminut pisussaavoq aningaasaqarnermut ataatsimiititaliap tunniussinissamut killissarititaa tikitsinnagu.

§ 30-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 30-mik ingerlatseqqinneruvoq imarisamigulli allannguuteqanngilaq.

Aalajangersakkami aalajangerneqarpoq ataatsimiititaliami ilaasortaq kinaluunniit kommunalbestyrelsimut suliasannngortitsisinnaasoq, taamaalillugulu aalajangiisinnaassuseq ataatsimiititaliamiit nuussinnaallugu.

Taamaattorli suliasat inatsit naapertorlugu ataatsimiititaliami ataavartumi suliasarititaasut suliasannngortinneqarsinnaanngillat.

§ 31-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 31-imik ilaatigut ingerlatseqqinneruvoq, imarisamigullu allannguuteqanngilaq. Naalakkersuisut siunnersuutigaat § 31 imm. 4-mi kommunalbestyrelsit periarfissinneqassasut kommunalbestyrelsinut ilaasortaannngitsunik toqqaasinnaanissaannut kommunalbestyrelsi sinnerlugu suliaqarsinnaasumik.

Imm. 1-imut:

Aalajangersakkakut aalajangiunneqarpoq ataatsimiititaliami ataavartumi qinersinerup kingorna ataatsimiititalianik allanik, isumalioqatigiissitani il.il. qinersisoqassasoq.

Imm. 2-mut:

Aalajangersakkap naggataani § 24, imm. 4-mi aalajangersarneqartoq naapertorlugu kommunalbestyrelsi ataatsimiititalianut il.il. inunnik qinersinerni aalajangiisinnaanngitsoq qinigaaffiit kommunalbestyrelsip atuuffianiit sivikinnerusumik atuutissasut.

Imm. 3-mut:

Aalajangersakkami ersarissarneqarpoq siunertaasoq kommunalbestyrelsi kisimi pisinnaatitaaffeqartoq immikkut ataatsimiititaliat taakkua qanoq katiternissaannik aammalu qanoq suliaqarnissaanik.

Malittarisassat atuutsinnissaat ataatsimiititaliani, isumasioqatigiissitaliani assigisaanilu atuutinneqartussaannersut aalajangersimasumik akineqarsinnaanngillat. Taamaattoq oqaatigineqassaaq malittarisassat taamaattut pisortatigut sullissinermi nalinginnaasumik tunngaviusutut malittarisassaappata, assersuutigalugu oqaluuserisassat aamma imaqarniliat suliarineqartarnerannut, kommuni pisussaassaaq aalajangersakkat taaneqartut immikkoortoq 1 naapertorlugu pilersinneqartuni atussallugit.

Ataatsimiititaliat pillugit aalajangersakkat ataatsimoortut sinnerisa kapitali 3-miittut ataatsimiititaliat pillugit atuunnissaat naatsorsuutigineqassaaq kommunalbestyrelsi allanik aalajangiisimannngippat, malittarisassat aningaasaqarnermut ataatsimiititaliami ataatsimiititalianilu ataavartuni toqqaannartumik aalajangersakkat eqqaassanngikkaanni, pingaarnerusumillu taaneqassapput malittarisassat inissitsiterluni ataatsimiinnermi atorneqartartut.

Imm. 4-mut:

Maannamut § 33, imm. 2-tut aalajangersagaq aqqissuussineq pissutigalugu siunnersuutigineqarpoq imm. 4-tut nutaatut ikkunneqassasoq. Maannakkut § 33 imm. 2-mi aalajangersagaq siunnersuutigineqarpoq ilaneqassasoq kommunalbestyrelsi pisinnaatinneqarsinnaasoq kommunalbestyrelsimut ilaasortaannngitsunik toqqaasinnaangorlugit kommunalbestyrelsimut soqutiginaatilinnik nalilerneqartunik suliaqartinnissaanut inatsisinik immikkut tunngavissaqartinneqartunut, imaluunniit kommunalbestyrelsip tamanna kissaatigippagu. Aalajangersagaq periarfissiivoq kommunalbestyrelsi sulianik immikkut ilisimasalinnik kommunalbestyrelsip suliaqartuutani ataatsimiititaliani, isumalioqatigiissitani il.il. kiisalu allani kommunalbestyrelsimut nalilerneqartuni soqutiginaatilittut.

§ 32-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 32-mik ingerlatseqqinneruvoq, oqaasertai allannguuteqarput imarisamigulli allannguuteqannngilaq.

Aaqqissuusseqqinnermut ataatsimiititaliap isumaliutersuummini siunnersuutigai qinikkat sulineranni aqqissuusinermi periarfissanik nutaanik pilersitsisoqassasoq, imaalillugu kommunini ataasiakkaani oqallisigineqarlunilu eqqarsaatigineqassasoq aqqissuussinerup qanoq ittup qinikkat sullissineranni pitsaanerpaasussap anguneqarsinnaajumaarnera.

Siunnersuummi kommunalbestyrelsi periarfissinneqarpoq aqutsinissaq kissaatigineqartoq aqqissuutissallugu inatsisip § 24-at aamma § 25-at killiliisorlugit, piunnaasaqatini aningaasaqarnermut ataatsimiititaliaq aalajangersimasunik suliaqarnermi kommunip pisariaqartitai naapertorlugit aqutseriaatsimik aqqissuussinnaasoq. Aqutseriaaseq aqutsinermik ileqqoreqqusani aalajangersarneqassaaq, tak. inatsimmi § 1, imm. 2.

§ 33-imut

Imm. 1-imut

Aalajangersagaq nutaajuvoq. Siusinnerusukkut suliaqarfik pineqartoq kommunalbestyrelsit, nunaqarfinni aqutsisut pillugit il.il. Inatsisartut inatsisaat nr. 20, 3. november 1994-imeersoq, § 18, imm. 5 aamma 6 aqutigalugit aalajangersaaffigineqarnikuvoq. Aalajangersagaq inatsisip matuma suliarinerani kukkunikkut ilaatinneqannngitsoorneqaralarpoq. Aalajangersakkap ilanngunneqarnerani inatsimmi aalajangersakkat normulersorneqarnerat allanngorpoq taamaasilluni maannakkut § 33 § 34-inngorluni il.il.

Aalajangersakkami aalajangerneqarpoq kommunalbestyrelsip qinigaaffiup iluani ataatsimiititaliaqarnerup iluseqartinneqarnera, ataatsimiititaliani ilaasortat amerlassusiat imaluunniit ataatsimiititaliat suliaqartuutani allanngortissinnaagai suliat ingerlanneqartarneranni malittarisassani § 1, imm. 2 aqutsinermut ileqqoreqqusap allanngortinneqartarnerinut maleruagassat tunngavigalugit.

Imm. 2-mut

Kommunimi ataatsimiititaliaqarnerup iluseqartinneqarnerata allanngortinneqarnera pissaaq § 1, imm. 2 naapertorlugu taamaalillunilu marloriarlugu suliarineqassalluni.

Imm. 3-mut

Ataatsimiititaliat iluseqartinneqarneranni allannguutigitinneqartut aningaasaqarnermut ataatsimiititaliap aammalu ataatsimiititaliat ataavartut aaqqissugaanerannut annertuumik sunniuteqarput taamaasilluni ataatsimiititaliat amerlassusaat allanngortittariaqarluni kommunalbestyrelsimi ilaasortap ataasiinnaap kissaatigippagu. Nutaamik inissitsiteqqinnermi periarfissaqassaaq taaseqatigiikkumallutik suleqatigiinnik nutaanik nalunaartoqarnissaanut.

§ 34-imut

Aalajangersagaq maannamut § 33-mut naleqqiullugu allannguutininik makkuninnga imaqarpoq: Maannamut atuuttuusimasoq § 33, imm. 2 peerneqarpoq.

Aalajangersakkami aalajangerneqarpoq kommunimi ataatsimiititalianut allanilu qinigaaneq pinngitsoorani qinikkatut sullissinissamut pisussaaffiusoq. Siunnersuut aqutugalugu taamatut suliaqarnissaaq kommunimi innuttaasunut qinigaanngitsunut perusuttunut kommunalbestyrelsip suliassamik tunniussisinnaaneraniq periarfissaq pingaarnertut peerneqarpoq. Tamanna tungaveqarpoq kommunerujussuit akisussaaffiisa suliassaasalu annertusineqarnerannik taamaattumillu qinigaanngitsunut akisussaaffiit aammalu aalajangiisinnaanerit tunniunneqarnissaat pissusissamisuumngimmat nakkutilliisut suliassaasa iluaniittut nakkutiginninneq kinguneqartitsisarnerlu isigalugit. Aalajangersakkami siunertarineqanngilaq suliassanik agguasarnermi allanngortiterisoqarnissaa taassuma iluani nunaqarfinni aqutsisut ilanngullugit.

§ 35-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 34-imik ingerlatseqqinneruvoq imarisamigullu allannguuteqanngilaq.

Imm. 1-imut:

Aalajangersakkakkut aalajangerneqarpoq ataatsimiititaliamut ilaasortanik marlunnik amerlanerusunilluunniit qinersisoqartillugu ilaasortaataqartut qanoq amerlatigisunik ilaasortaqaassusiat naapertorlugu kisitsisit agguarnerat naapertorlugu naatsorsueriaaseq atorlugu qinersineq ingerlanneqassaaq ataatsimiititaliani tamani immikkut atorneqartassasoq tamannattaq atuuppoq isumalioqatigiissitanut, siulersuisunut il.il.

Imm. 2-mut:

Aalajangersakkakkut aalajangerneqarpoq ataatsimiititaliani borgmesterip ilaasortaaffiginngitsuugassarinnigisaani amerlassutsit eqqarsaatigalugit qinigaaffimmi

suleqatigisaminut borgmesteri ilaatinneqartassasoq. Ilaasortaqaassuseq naapertorlugu qinersinermi erserpat borgmesterip qinigaaffimmi suleqataasa pingasuusariaqarnerat taava borgmesterip saniatigut ilaasortassanik marlunnik qinersisoqartassaaq. Eqimattami borgmesteri ilaatinneqareerluni pingasunik ilaasortaqaassappat, marlunnik ilaasortanik allanik ataatsimiititaliamut qinersisoqassaaq. Tamanna aamma isumalioqatigiissitanut, siulersuisunut, il.il. atuuppoq.

Imm. 3-mut:

Aalajangersakkami iluarsiiiffigineqarput kommunalbestyrelsimi ilaasortamik aamma ilaasortaangitsumik ataatsimiititalianut assigisaannullu qinersisarnermi pissutsit.

Ilaasortaqaassuseq naapertorlugu inunnik arlalinnik qinersisoqassatillugu tunngaviusumik naatsorsuutigineqartarpoq suleqatigiiaat tamarmik naligiimmik kiffaanngissuseqarlutik inuttaliinissaminut inissisimassasut. Tamatuma malitsigisaanik suleqatigiiaat inissanik imaluunniit inissamik kingullermik inissittoqartussaattillugu qinersisinnaanermut periarfissaat killeqarnerulersinnaapput, ilaasortat aalajangersimasut nungussimasinnaammata. Aalajangersagaq assersuutigalugu ataatsimiititalianut § 31, imm. 3 naapertorlugu pilersinneqartut katiterneqarnissaannut attuumassuteqarpoq.

Imm. 4-mut:

Aalajangersakkami ingerlateqqinneqarpoq ilaasortaataitaqartut qanoq amerlatigisunik ilaasortaqaassuasiat naapertorlugu kisitsisit agguarnerat naapertorlugu naatsorsueriaaseq atorlugu qinersisarnermi periuseq d'Hondts-ip periusaanik taaneqartartoq. Aalajangersagaq malittarisassamik ilassuserneqarpoq, kattusseqatigiit inissamik inuttaqanngitsumik inuttaleerusunnippata taava inissaq kattusseqatigiinnit allanit d'Hondts-ip periusaa malillugu pissarsiarineqartassaaq.

Malittarisassap atuutinnerani nalornisoqartarmat inatsisip matuma akuerineqarneranut atatillugu ilitersuummik suliaqartoqassaaq, tamatumani d'Hondts-ip periusaa qanoq atorneqartassanersoq erseqqissumik takutinneqarluni.

§ 36-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-mersumi atuuttumit § 35-mik ingerlatseqqinneruvoq imarisamigullu allannguuteqanngilaq.

Imm. 1-imut:

Aalajangersakkami aalajangerneqarpoq qinigassanngortittumik ataatsimik qinersinermi amerlanerussuteqartoqassasoq. Qinigassanngortittut ilaannaalluunniit siullermeerluni taasinermi amerlanerussuteqartunit taaneqanngippat, taaseqqittoqassaaq. Taasinikkut tamatumuuna aamma qinigassanngortittoq ataaseq amerlanerussuteqavissumik taaneqanngippat taaseqqittoqassaaq qinigassanngortittut marluk amerlanerpaanik

taaneqarsimasut akornanni, taasinerlu taanna naligiiffiulluni inernejarpat makitsisoqartassaaq. Makitsineq borgmesterimit ingerlanneqartassaaq.

Imm. 2-mut:

Aalajangersakkami aalajangernejarpoq kommunimi sulilerumallutik qinnuteqartut arlallit akornanni ataatsimiititaliani toqqaanissami imaluunniit kommunalbestyrelsimi taasinissami immikkut periaaseqarnissaq.

Atorfinitsitsinissamut atatillugu oqaluuserinninnermi tunngavissatut qinnuteqartut pillugit paasissutissat tamarmik saqqummiunneqassapput, toqqaanissamilu taakku arlaat kinaluunniit siunnersuutigineqarsinnaavoq. Taamaattumik toqqaanissaq, tamanna isumaqatigiinngissutigineqanngippat, qinnuteqartut ilaannaanut, soorlu ataatsimiititaliamit imaluunniit allaffimmit inassutigineqarsimasunut, tunngatinneqarsinnaanngilaq.

§ 37-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 36-imik ingerlatseqqinneruvoq imarisamigullu allannguuteqanngilaq.

Imm. 1-imut:

Aalajangersakkakkut pissutsit sillimaffigineqarput, ataatsimiititaliami ilaasortaq qinigaaffiup iluani ilaasortaajunnaarpat taamaalillunilu ilaasortamik allamik taarserneqartussangorluni.

Aalajangersakkami aalajangernejarpoq ilaasortat suleqatigiinneersoq tunuarpat aamma tassaassasoq suleqatigiit taakku ilaasortamik nutaamik qinersisussat.

Imm. 2-mut:

Kommunalbestyrelsip ataatsimiittarnerinit ataatsimiititaliat amerlanerusunik ataatsimiittarmata, ataatsimiititalianili ilaasortat tamatigorluinnangajak ikittuinnaat peqataasarnerisa kingunerannik tamakkiisumik peqataasoqartarnissaa pisariaqartinneqartarmat, tak. § 26. imm. 2-mut nassuiaatit, sinniisussap killilersorneqanngitsumik ataatsimiititaliamut ataatsimiigiaqquneqarsinnaanera ilanngunneqarpoq.

Taamaakkaluartorli kommunalbestyrelsimut ilaasortap taamatut sulinini ingerlatiinnartillugu piffissap ilaani ataatsimiititaliamit imminut tunuartikkallarsinnaanngilaq, aamma tak. § 15, imm. 2-mut nassuiaatit, tamatumani aningaasaqarnermut ataatsimiititaliamut aammalu ataatsimiititalianut ataavartunut qinigaanerit pisussaaffiummata.

Qinigaaffimmi suleqatigiit aalajangigassaraat sinniisussamik ataatsimiigiaqqusinermit piumasaaqatit naammassineqarsimanersut.

Qinigaaffimmili suleqatigiit pisussaannngillat ataatsimiititaliami inissaq inuttaqanngikkallartoq ilaasortap najuutinngitsup sinniisussaanut tunniutissallugu.

Aalajangersagaq taamaallaat atorneqassaaq ilaasortanut ataatsimiititaliami ilaasortassatut qinigaasimasunut, atorneqassananili pinngitsoorani ilaasortaasussanut, soorlu borgmesteri

pinngitsoorani aningaasaqarnermut ataatsimiititaliamut ilaasortaasussaasoq. Taamaattumik borgmesterip najuussinnaanngikkallarnerani aningaasaqarnermut ataatsimiititaliamut ilaasortamik nutaamik qinersisoqarsinnaanngilaq, ulluinnarnili allaffiup aquneqarnera, tak. siunnersuutip § 22, imm. 2, borgmesterip tullianit ingerlanneqalersimappat borgmesterip tullia aningaasaqarnermut ataatsimiititaliamut aamma siulittaasunngusaaq.

Borgmesterip tullia aningaasaqarnermut ataatsimiititaliamut ilaasortaareerpat borgmesterillu suliaanik suliaqalerpat ataatsimiititaliami inissaq ataaseq inuttaarutissaaq.

§ 38-mut

Aalajangersagaq maanna kommunit aquneqarnerat pillugu Inatsisartut inatsisaat nr. 14, 5. december 2008-meersumi atuuttumit § 37-imik ingerlatseqqinneruvoq imarisamigullu allannguuteqanngilaq.

Imm. 1-imut:

Aalajangersakkami periuseq maannamut atuuttoq inatsimmi aalajangersarneqarpoq ataatsimiititaliani oqaluuserineqarnerini suliassamut aalajangersimasumut attuumassuteqarneq pissutigalugu aalajangeeqataasinnaannginnermut tunngatillugu suliassap suliarineqartarneranut tunngasoq. Aalajangersagaq ataatsimiititalianut tamanut atuuppoq.

Malittarisassat kommunalbestyrelsinit atuuttut, tak. § 14-imut nassuiaatit, assigalugit suliassamut attuumassuteqarneq pissutigalugu aalajangeeqataasinnaajunnaarsitaanissaq ilumut pissutissaqarnersoq pillugu aalajangiiniarnerit pisortat ingerlatsineranni suliat suliarineqartarnerat pillugu Inatsisartut inatsisaanni malittarisassat naapertorlugit pisassapput. Periutsimik inatsimmik tunngaveqalersitsinermi pineqarput ataatsimiititaliani kommunalbestyrelsimilu suliassamut attuumassuteqarneq pissutigalugu aalajangeeqataasinnaajunnaarsitaanerit pillugit apeqqutit malittarisassat assigiit malillugit suliarineqartarnissaat.

Imm. 2-mut:

Kommunalbestyrelsimi ilaasortat borgmesterimut nalunaartussaataitanerat pillugu § 14, imm. 2-anni aalajangersakkanut suliassamut attuumassuteqarneq pissutigalugu aalajangeeqataasinnaajunnaarsitsinissaq nalornisoorfiutillugu aalajangersakkamut una assinguvoq.

Imm. 3-mut:

Aalajangersakkakkut qularnaarniarneqarpoq ilaasortap ataatsip suliassamut attuumassuteqarneq pissutigalugu aalajangeeqataasinnaajunnaarsinneqarneratigut kommunalbestyrelsimi pissaanerup oqimaaqatigiinnerata nikisinneqartannginnissaa.

Kommunalbestyrelsimi ikinnerussuteqartut amerlanertigut ataatsimiititaliani ataasiinnarmik ilaasortaataqartarnerat eqqarsaatigalugu aalajangersarneqarpoq § 14, imm. 3-mi aamma 4 ataatsimiititaliani sulinermi atuutissaaq ikinnerussuteqartunut illersuutitit.

Imm. 4-mut:

Imm. 3-mut nassuiaatit innersuussutigineqarput.

Kommunalbestyrelsip ataatsimiititaliai nalinginnaasumik ilaasortakitsuusarmata malittarisassat § 14, imm. 4-miittut, ilaasortap ataatsip suliamut attuumassuteqarneq pissutigalugu aalajangeeqataasinnaajunnaarsitaanini pissutigalugu najuutinngikkaluartup aammalu sinniisussap ataatsimiititaliap suliassaminik ingerlatsinissaanut aggersarneqarsimanngikkaluartup, suliap naammassineqarnissaanik ilaasortat 2/3-iisa piumasaaqateqarsinnaanerannut tunngasut naleqquttuusorineqarpoq nuunneqarnissaat.

§ 39-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 38-imik ingerlatseqqinneruvoq imarisamigullu allannguuteqanngilaq.

Imm. 1-imut:

Aalajangersakkakut aalajangerneqarpoq ataatsimiititaliani ilaasortat pisortat ingerlatsivianni ataatsimiititaliap akisussaaffigisaani sullissinertik sapinngisamik akissarsiaqaatigissanngikkaat. Taamaattorli periarfissiisoqarpoq ataatsimiititaliami ilaasortaq suliassamik tiguisinnaasoq, suliassaq tamanut ammasumik sularinnittussarsiorneqareersimappat. Aammattaaq ilaasortaq qaqutigunnaq pisartunik akilerneqarluni sulisarsinnaavoq pisortatigut ingerlatat ilaani ataatsimiititaliamit akisussaaffigineqartumi pissutsinik immikkut ittunik pisoqartillugu. Tamanna atuutinneqarsinnaavoq ilaasortaq kisimiilluni suliassap naammassineqarnissaanut pisinnaasat pisariaqartut ilaasortap kisimi naammassisinnaappagit.

Imm. 2-mut:

Aalajangersagaq ilanngunneqarpoq periaatsit tulluanngitsutut assersuutissat arlallit tunngavigalugit, tassa inuit appasinnerusumi atorfeqartut imaluunniit nunaqarfinni atorfeqartut nalinginnaasumik kommunini qinikkatut pisortanut allaffimmiluunniit pisortanut toqqaannartumik qanittumilluunniit attaveqanngitsut kommunit ataatsimiititaliaani ataavartuni ilaasortaasinnaasarsimanngimmata. Taamaattumik ilanngussisoqarpoq qanoq ungasitsigisumiinneq killiliiffigineqartalissasoq, pingaartumik siunertaralugu inuit sulianut attuumassuteqarnertik pissutigalugu ataatsimiititaliani ilaasortaasinnaajunnaarsinneqarsinnaasut taamalu sularinneqataasinnaanngitsut, imaluunniit ataatsimiititaliami ilaasortaanerisa nassatarissappassuk ilaasortap pineqartup nammineq suliffigisaminut nakkutilliisooqataalernissaa.

Pingaartumik sulisoq qulliunerusumik atorfeqarluni sulisuuppat nangaanartoqassaaq, marloqiusamimmi inissittoqartannginnissaa pillugu sianigisassat ilagaat immikkoortorta qarfimmi akisussaaffeqarluni sulisup ataatsimiititaliami aalajangeeqataasinnaasutut inissinnginnissaa, taamalillunilu ilaasortap suliassanut nammineq inassuteqaqataaffigisimasaminut aalajangeeqataasussaajunnaarnissaa.

Nr.1-mi pineqarput ataatsimiititaliat ataavartut suliassa qarfiini pisortat aamma sulisut atorfe qarnermi periaatsit malillugit, suliassat allattorsimaffiat imaluunniit oqartussaaffiit agguataarne qarnerat malillugit suliallit immikkoortorta qarfinni pisortanut paarlattaasartussat. Immikkoortorta qarfinni pisortatut assersuutigineqarsinnaapput isumagininnermi pisortat, atuarfiit pisortaat aamma kommuneingeniørnit.

Nr. 2-mi inuit pineqartut naliliiffigineqassapput taakku suliassa imarisaat tunngavigalugit. Kommunalbestyrelsit ataasiakkaat namminneq ingerlatsinertik qanoq aaqqissuutissallugu annertuunik periarfissaqartitaapput, tamakkununga ilanngullugit sulisuni sunik suliassa qassanersut atorfimminnilu qanoq taaguuteqassanersut, killiliiniarnermili atorfiit qanoq taaguute qarneri kisimik pingaartinneqartussaangillat. Pingaartinneqartariaqarput aaqqissugaanermi oqartussaaffiillu agguataarne qarneranni atorfiit imarisaasa nalunaarsorne qarneri il.il. tunngavigalugit pineqartut qanoq pisinnaatitaaffeqartigineri aalajangiutissallugit. Pingaarute qarluinnarpoq atorfilik nalinginnaasumik pisortatut akisussaaffeqarnersoq namminerlu sulisunik siulersuga qarnersoq. Atorfiup aningaasarsiaqarnerup tungaatigut inissisimanera aamma tikkuusooqataasinnaavoq.

Sulisunut nr. 2-mi aalajangersakkat malillugit ataatsimiititaliani ataavartuni ilaasortaasinnaangitsunut assersuutitut taaneqarsinnaapput allatto qarfinni pisortat, immikkoortorta qarfinni pisortat, allaffinni pisortat allallu immikkut suliso qarnermut akisussaaffillit. Aamma sullissivinni pisortat allallu sullissivinni allaffissornikkut pisortatut suliqartitat ataatsimiititaliani ataavartuni sullissivimmut akisussaasuni ilaasortaasinnaangillat.

Imm. 3-mut:

Nr. 1-mi pineqarput sulisut tamarmik aningaasa qarnermut ataatsimiititaliap suliassaataanik, aningaasa qarnermut immikkoorto qarfiup, akissarsianut suliso qarnermullu immikkoorto qarfiup suliassaataanik suliallit aningaasa qarnermut ataatsimiititaliamut ilaasortaasinnaatitaasussaanginneri.

Nr. 2-mi pineqarput pingaartumik sulisut ingerlatsiviup ilaani, nr. 1-imut ilaangikkaluartuni, aningaasa qarnermut ataatsimiititaliamit akisussaaffigineqartuniittut, assersuutigalugu inuit pilersaarusiornermik suliallit aamma immikkoorto qarfinni aningaasa qarnermut ataatsimiititaliamit toqqaannartumik akisussaaffigineqanngikkaluarlutik tassunga attuumassuteqartuni, assersuutigalugu akileraaruserivimmi inunnillu allattuiffinni sulisut.

Nr. 3-mi immikkoorto qarfinni pisortat pineqartut, imm. 2-mi nr.1-imi pineqartut assignagit immikkoorto qarfinni pisortamut paarlattaaginnartut aningaasa qarnermut ataatsimiititaliamut ilaasortaasinnaanerat akornutissaqartinneqanngilaq.

Imm. 4-mut

Aalajangersagaq inatsimmi atuuttumi § 31, imm. 4-mik ingerlatitseqqinneruvoq, tamatumuuna inatsisitigut aalajangiunneqarluni aapparisaq pissutigalugu aalajangeeqataasinnaajunnaarneq atortuusassasoq tamatuma pisortat ingerlatsineranni suliat suliarineqartarnerat pillugu inatsimmi aalajangersarneqarnerata kinguneranik. Aappariinnerni katissimanertut assersuunneqarsinnaasuni paasineqassaaq aappariinneq sivilisunerusumik ingerlanneqarsimasoq imaluunniit aappariit najugaqatigiippata.

§ 40-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 39-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq. Kommunit ukioq naatsorsuiffiusoq tassaavoq qaammatisiutini ukioq ilivitsaq.

§ 41-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 40-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm 1-imut:

Aalajangersakkakut aalajangerneqarpoq aningaasaqarnermut ataatsimiititaliaq pisussaasoq ukiumut naatsorsuiffiusussamat ukiunullu arlalinnut missingersuusiortassalluni. Ukiunut arlalinnut missingersuusiaq ukiunit pingasunit sivikinnerutinneqassanngilaq. Aalajangersakkakut siunertarinerpoq kommunip missingersuutiniq suliaqartarnerinut atatillugit pilersaarusiortarnissat pingaaruteqassusiisa erseqqissisinnissaat.

Imm. 2-mut:

Aalajangersakkap erseqqissisippaa siunnersuummi § 44, imm. 2 peqatigalugu aningaasartuutit isertitallu suulluunniit missingersuusiortarneri akuerineqareersimassat. Aalajangersakkakuttaaq kommuni pisussaaffilerneqarpoq aningaasanik tigoriaannagassanik aningaasallu oqimaqatigiissinnerannut missingersuusiortarnissamat, tamatumalu kommunip aningaasanik tigoriaannarnik nalinginnaasumik aqutsineranut pingaaruteqaannarani aammattaaq kommuni pisussaaffilerpaa naalakkersuinikkut anguniagassanik aalajangiisarnissaanut, soorlu kommunimut akiligassat ikilisinniarneqarnerannut.

Imm. 3-mut:

Aalajangersakkakut kommuni aningaasartuutissatut isertitassatullu naatsorsuutigisaviit tunngavigalugit missingersuusiortarnissaminut pisussaaffilerneqarpoq. Taamaalilluni aalajangersagaq una malillugu kommuni inatsisinut naapertuutinnngitsumik iliussaaq pisortat ikiorsiissutaannit aningaasartuutissat ikinaarlugit akileraarutitigulluunniit isertitassat

amerlanaarlugit missingersuusiorunigit, sinneqartooqqusinermik imm. 4-mi piumasarisaq saneqqunniarlugu.

Kommunalbestyrelsit inatsisitigut pituttorsimannigtsuni aningaasaliissutissanik immikkoortitsissapput ukiup missingersuusiorfiup iluani qinikkat anguniagaannut tullerriaarnerinullu naleqquttumik, aammali saniatigut aningaasanik killiliillutik immikkoortitsisinnaapput ingerlatsinermut sanaartornermullu aningaasaliissutit iluanni imaluunniit ingerlatsinermut sanaartornermullu sillimmasersinnaallutik, missingersuummut akuerisamut sanilliullugu aningaasartuutit isertitalluunniit naatsorsuutigeriinngisat sillimaffiginiarlugit.

Kommunip aningaasanik pisassai pillugit, pingaartumik akiligassalinnit, kommunalbestyrelsi piviusorsiorlumik naliliinissaminut taamaalilluni aamma pisussaaffeqalerpoq.

Imm. 4-mut:

Aalajangersakkakut aalajangerneqarpoq kommuni ingerlatsinermi aningaasanillu tigorianaannarnik amigartooruteqarsinnaanermut taamaallaat missingersuusiorsinnaasoq,

- 1) amigartoorutissaq immikkut taarsigassarsinani aningaasalersorneqarsinnaappat,
- 2) ukiup missingersuusiorfiup iluani tamarmi ilaannaaniluunniit taarsigassarsiaqarsimaneq pisinnaappat Naalakkersuisunit akuerineqarani imaluunniit,
- 3) missingersuut akuersissutigittinnagu taarsigassarsinissamik Naalakkersuisunit akuerineqareersimagaanni.

Naalakkersuisut siunnersuutigaat aalajangersakkap attartornermut pigisamik ukiumoortumik akiliuteqartarnikkut atuisinnaatitaalluni pigileriartorneqartussamik pissarsineq atorlugu attartoriaaseq assingusunik ilaneqarnissaa.

Naalakkersuisut attartornernut atornermullu attartoriaaseq pigisamik ukiumoortumik akiliuteqartarnikkut atuisinnaatitaalluni pigileriartorneqartussamik pissarsisarnermut tunngasunik sukumiinerusumik aalajangersaanissamut, tak. § 45, attartornernut aamma pigisamik ukiumoortumik akiliuteqartarnikkut atuisinnaatitaalluni pigileriartorneqartussamik pissarsineq atorlugu attartoriaaseq aqutigalugu isumaqatigiissusiornermi ikinnerpaaffissaliinissat aalajangersarneqartassapput.

Imm. 5-imut:

Naalakkersuisut kommunit missingersuusiornerini sukumiisumik malitassiorsinnaatitaalernerannut atatillugu periarfissaqalerportaaq missingersuusiornermi maleruagassat pisarialimmik eqaallisinnissaannut, taamaalilluni inuiaqatigiit ineriartornerat malillugu naleqqussarneqarsinnaangorlutik.

§ 42-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 41-imik ingerlatseqqinneruvoq, oqaasertai allannguuteqarput imarisamigullu allannguuteqanngilaq.

Imm 1-imut:

Aalajangersagaq § 10-mut immikkut aalajangersagaavoq, tassani aalajangersarneqarmat suliaasap kommunalbestyrelsimi ataasiaannarlugu suliarineqarnissaa piumasarineqarluni. Ukiumut missingersuut aamma ukiunut arlalinnut missingersuusiaq kommunip allaffissornikkut sulinissaanut toqqammaviuvoq, taamaattumillu pingaaruteqarpoq ukiumut missingersuutip sukumiisumik suliarineqartarnissaa.

Imm. 2-mut:

Aalajangersakkakut aalajangerneqarpoq kommunalebestyrelsip missingersuutit pillugit suleriaatsini nammineerluni pilersarusiortassagaa, tamatumani ilaassallutik allangortitsinissanut siunnersuutit saqqummiunneqartarnissaanut periaatsit.

Naalackersuisulli nalinginnaasumik suleriaasissami aalajangersakkanik pineqartuni inatsisit atuuttut tunngavigalugit ilassuteqarsinnaapput, tassalu missingersuutit siullermeerilluni suliarineqarnerini nalinginnaasumik oqallisigineqartassasut, aappassaaneerinninnermilu suliarinninnermi immikkoortukkuutaarilluni aningaasaliissuteqarnissami tulleriaarinerit kommunalbestyrelsimi isummerfigalugit oqallinneqartassasoq.

Avissaarsimatitsinerup tamatuma ingerlatiinnarnissaa kissaatiginarpoq, taamaaliornikkut ukiumut missingersuummut ilaasortat ataqatigiissumik isummersinnaalissammata aammalu pingaarnersiuisumik saqqummiussisoqarsinnaassammat, taamattaaq ukiunut arlalinnut missingersuusiamut tunngatillugu kommunalbestyrelsimi ilaasortat allat kissaataannut ilisimaneqalersunut isummersinnaalersillugit.

Kommunalbestyrelsi siullermeerinninnermi missingersuummi tunngavigisaasunik allangortitsisinnaavoq, tamatumalu kinguneranik aningaasaqarnermut ataatsimiititaliaq aappassaaneerinninnissamat ukiumut missingersuusiami nalimmassaasinnaassalluni.

Kommunalbestyrelsi suleriaatsimik aalajangersaasimangippat nalinginnaasumik suleriaaseq atorneqassaaq.

Imm. 3-mut:

Aalajangersakkakut aalajangerneqarpoq ukiumut missingersuutip aalajangiiffiginissaata ullulerneqarnera.

Aalajangersakkap immikkoortuata aappaanni Naalackersuisut ukiumut missingersuutip akuersissutigineqarneranut atatillugu immikkoortiterinissamik aalajangersaasinnaaneritut aalajangersakkami aamma nakkutilliisuutitatut oqartussat aalajangersakkanik suliaqarsinnaaneri nalunaarneqarpoq. Aamma Naalackersuisut nalinginnaasumik ingerlatsinermi taasisarnerit tulleriaarneqarnissaat pillugu malittarisassanik aalajangersaasinnaapput.

Ukiumut missingersuummi immikkoortiterinissami malittarisassat aalajangiunneqarnerini Naalackersuisut § 41, imm. 2-mut aamma 4-mut pituttorsimapput, taamaalillunilu ukiumut missingersuut isertitanik, aningaasartuutinik aammalu aningaasaqarnikkut nikingassutinik imaqaassalluni. Tamatuma kingunerissavaa ukiumut missingersuut siunnersuutitut ataatsimoortutut taasissutigineqartussaassanngitsoq, tamannami nallersuutissammat aalajangersimasumik ingerlatsinermut aammalu aningaasat tigoriaannaat qanoq

inissisimanissaannik taasisoqarnera, tassa § 41, imm. 2 naapertorlugu ukiumut missingersuummut ilaangimmat, kisiannilu tamatuma kinguneralugu. Sinneqartoornissamik apeqqutip oqallisigineqarnera ukiumut missingersuutip siullermeerneqarnerani oqallisigissallugu pissusissamisoorpoq, tamannalu kommunalbestyrelsip kiffaanngissuseqarluni iliuseqarsinnaaneranut killiliisuvoq.

Ukiumut missingersuutip taarsigassarsinissamik ilaqarnissaanik, tamatumanilu kommunalbestyrelsip Naalackersuisunit akuersissummik siumoortumik tunniusaqartoqarsimatinnagu aalajangiiffigisinnaangisaanni, § 41, imm. 4-mi inerteqqutaaneraniq piumasaaqatip aamma kinguneraa aalajangiinissami periaaseq ima ingerlanneqassasoq, § 41, imm. 4 naapertorlugu aningaasartuutit imaluunniit ikinnerusunik isertitaqarnissap qaqugukkut aalajangernissaa kommunalbestyrelsimi ilaasortanit erseqqissumik ilisimaneqarnissaa.

Ukiumut missingersuutip qanoq assigiinngiaartigisunik amerlassusilersornissaanut aalajangerneqarnerani ataatsimoortukkaartumik anigaasartuutunik isertitanillu missingersuusiisarnissamik aammalu ukiumut missingersuut qanoq annertutigisumik kontut immikkuutaartinneqarnissaannik imaqarsinnaaneraniq aalajangersaasoqarsinnaavoq. Taakku periusitut killiunneqarnissaat nalinginnaasumik iliuseqarnissamut kiffaanngissuseqarnermik annikillisisinnaaneri pissutigalugit qanoq immikkoortukkaartigisumik qaffasiffilerneqarnerisa assigiinngippaallarnissaat naleqquttutut isigineqanngilaq.

Aalajangersagaq § 41, imm. 5 pillugu immikkut aalajangersakkatut aamma isigineqassaaq, aalajangersakkanillu siammasinnerusunik aalajangersaanissaq ukiunut missingersuusiorneq pillugu nalunaarusiornissami pissaaq.

Imm. 4-mut:

Aalajangersagaq Naalackersuisut nakkutilliisussaataitanerisa kinguneraat.

§ 43-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 42-mik ingerlatseqqinneruvoq imarisamigullu allannguuteqanngilaq.

Imm 1-imut:

Aalajangersakkakut aalajangerneqarpoq ukiumoortumik missingersuusiap aamma ukiunut arlalinnut missingersuusiap akuerineqarnerisa kingorna kingusinnerpaamik ullut 14-it qaangiutsinnagit pisortatigoortumik saqqummiunneqassasoq. Aalajangersagaq kommunalbestyrelsip aalajangiisarnerisa avammut ammaannerunissaannut ilapittuutaassaaq.

Imm. 2-mut:

Aalajangersagaq qanimut oqartussaaqataanerup nukittorsarnissaanik siunertaqarpoq. Missingersuusiami paasissutissat qanoq imaqarnissaannik immikkut piumasaaqateqartoqanngilaq, taamaallaalli imarisaa ilisimatitsissutinik kikkunnut

illersuinanilu akerliunngitsunik imaqassaaq. Ilisimatitsissutit kommunalbestyrelsimi ilaasortanit imaluunniit kommunalbestyrelsimi partiinit ilaasortaaffeqartunit qinikkatut nammineq ilaliussanik ilaqassanngillat, atuagassianik imaluunniit takussutissanik saqqummiinissaq kommunip suliastrarinngimmagu isummanik qinikkat nammineq isummersuutaannik imaqartunik ilaqassanngillat.

Missingersuummili ilisimatitsissutit aamma ukiunut tulliuttunut missingersuutitut ilisimatitsissutit saniatigut kommunip nalinginnaasumik suliaqarfiinik ilisimatitsissutinik imaqarsinnaavoq.

§ 44-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 43-mik ingerlatseqqinneruvoq imarisamigullu allannguuteqanngilaq.

Imm 1-imut:

Aalajangersakkakut aalajangerneqarpoq missingersuummut aalajangiiffigineqarsimasumut kommunalbestyrelsi pituttorneqartoq, taamaallunilu taamaallaat imm. 2 naapertorlugu aningaasartuutigineqarsinnaasoq imaluunniit isertitaqarfiusinnaasoq tamakku missingersuusiami ilaatinneqarsimappata. Maannakkut inatsimmi atuuttumi kukkusumik § 40 imm. 3-mut innersuussutigineqarpoq ilumoortumik § 41 imm. 3-mut innersuunneqartussaalluni. Tamanna siunnersuummi aaqqinneqarpoq taassumalu imaraa § 42 imm. 3-mut innersuussutigineqarmat taassumalu kingorna ukiumut missingersuusianik tunniussivissatut killigitinneqartoq aaqqinneqarluni.

Imm. 2-mut:

Aalajangersagaq aningaasalissuteqartarnissamut pisinnaatitaassutsip allanut tunniunneqarsinnaaneranut inerteqqutaavoq. Taamaattorli ajoqutissaqartinneqanngilaq aningaasaliissutaasut aalajangersimasut ilaannik kommunalbestyrelsi atuisinnaatitsisinnaasoq aningaasaqarnermi ataatsimiititaliamit akuersisoqarsimatillugu.

Kommunalbestyrelsip missingersuummi nuussisoqarsinnaaneranik pisinnaatitsisinnaanera immikkoortumi 1-imi pingaarnertut aalajangersakkami ilanngunneqarpoq.

Aalajangersakkami siunertaavoq missingersuusiami nuussiterisoqarsinnaanernik suleriaaseq eqaallisassallugu. Piumasaqaataavorli aningaasaqarnermut ataatsimiititaliaq ataatsimiititalianut attuumassuteqartunut kommunalbestyrelsip pisinnaatitaanera naapertorlugu apeqqutini isumaqatiginninniaqqaartassasoq, tak. § 29, imm. 3.

Kommunalbestyrelsip pisinnaatitsinerani erseqqissumik nalunaarneqassaaq suna pineqarnersoq, tassunga ilaallutik aningaasat amerlassusissaat killilerneqarsimanersaq, ataatsimiititat sorliit aningaasaliiffiilluunniit sorliit pineqarnermut. Taamaattorli periarfissaqanngilaq aningaasaqarnermut ataatsimiititaliaq pisinnaatissallugu ingerlatsineranut aningaasaliissutinit sanaartornermut aningaasaliissutitut, killormulluunniit, nuutsisinnaanermut.

Imm. 3-mut:

Ilasutitut aningaasaliissuteqarnerup aningaasalersornissaa aalajangiinermi imaqarniliami erseqqissumik nalunaarneqassaaq, tassanilu pineqarlutik aningaasartuutissatut isertitassatullu akuersissutit, taamaallunilu inatsisinik saneqqutsinerussalluni soorlu aningaasalersuinissamik apeqquutip ukiumut missingersuusiortumut tullermut kinguartinnera imaluunniit aningaasalersuinissamik apeqquutip ukiup ilaani sipaarniuteqarfissatut pilersaarummut kinguartinneqarneranik aalajangerneq.

Missingersuutip akuersissutigineqarneranut atatillugu kommunalbestyrelsip nalunaarutigisimappagu suliassat suut aningaasaliissutinit aalajangersimasunit matuneqassanersut, taava aningaasartuutissartalimmik aningaasaliissuteqarnermut atatillugu aningaasaliissutinut taakkununga taarsiullugu sipaarniutissani nalunaarneqassaaq, suliassanut pilersaarutinut sunut allannguut sunniuteqassanersoq aamma ilanngullugu.

Immikkoortup aappaani erseqqissarneqarpoq missingersuusiortumut piviusersiornissamik piimasaqaat aammalu § 41, imm. 3-mi amigartooruteqartumik missingersuusiornissamut inerteqqut ilasuteqarluni aningaasaliissuteqarni atorneqartassasoq.

§ 45-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 44-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Aalajangersakkat nr. 2, 3 aamma 4-mi aalajangerneqartut taamaallaat iliuusaannut aamma taakkua annertussusaannut killiliisuussapput. Nalinginnaasumik akuersissutinut taamaattunut oqaatigineqassaaq pissutsit naapertorlugit Naalakkersuisut piimasaqaateqarsinnaapput, assersuutigalugu kommunip aningaasatigut aqutsineranut imaluunniit missingersuusiortumut aalajangersarneqarnerannut. Taamatut piimasaqaateqarsinnaanerup annerusumik siunertaraa inatsisitigut killissarititaasut aammalu missingersuutigisimanngisanik aningaasaqarnikkut kommunit akiligassaqalinnginnissaat sillimaffigereerniarlugu.

§ 46-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 45-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm 1-imut:

Aalajangersakkakkut aalajangerneqarpoq kommunip naatsorsuutiminik allattuinermini aningaasaatimi qanoq aqunneqarnerinik piviusersiortumik takusassiaqarnissaa. Naatsorsuutininik allattuineq piviusersumik paasissutissiissaaq kommunalbestyrelsip aalajangiinerisa aamma kommunip ingerlatsineranik aammalu ukiumut missingersuutip akuersissutigineqarsimaneranut tunngatillugu.

Imm. 2-mut:

Aalajangersagaq innersuussivoq aningaasaateqarfiit aningaasaataannik inissiinissamik aalajangersakkanut, tak. Justitsministeriap nalunaarutaa nr. 97, 15. marts 1985, allanngortinneqartoq nalunaarut nr. 144, 16. 1988-meersukkut aammalu nalunaarut nr. 294, 3. maj 1989-imeersukkut.

Matumani Inatsisartut inatsisaanni siunniussimaneqannginnera pissutigalugu kommunip inuussutissarsiornernut aningaasaliinissaannut periarfissaqarnerisa aalajangersarneqarnissaanut tunngatillugu, kommunip aningaasaataannik inissiinissamik periarfissat obligationinut killilerneqarput, oqaatigineqassaarlu Justitsministeriap nalunaarutaani tamanna ilaatinneqanngimmat aningaasaateqarfiit aningaasaataannik obligationinut allanngortinneqarsinnaasunut tunngatillugu.

§ 47-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 46-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Aalajangersakkakut aalajangerneqarpoq § 48-mi aalajangersagaq peqatigalugu qanoq ililluni kommunip naatsorsuutai suliarineqartassasut akuersissutigineqartassasullu.

Imm. 1-imut:

Aningaasaqarnermut ataatsimiititaliaq kommunalbestyrelsimut naatsorsuutunik saqqummiussisuusassaaq. Naatsorsuutit kommunip aningaasaqarnikkut pisussaaffiinik aammalu missingersuutit aamma naatsorsuutini nikingassutunik oqaaseqaatinik nassuiaataasunik imaqartassapput. Naatsorsuutit saqqummiunneqarnerini taamatuttaaq oqaaseqaatinik ilaqartinneqartassapput aningaasaqarnikkut iliuuserisat allat attuumassuteqartunik, ilaatigut kommunip aningaasaliissuteqarnissamut pilersaarutai aammalu ukiunut arlalinnut missingersuutit il.il. ilaatinneqassallutik, assersuutigalugu ukiunut arlalinnut sivilissuseqartunik suliniutunik aammalu allanngortinneqartassasut suliarineqartassasut tunngassuteqartunik ilaqartinneqartarlutik.

Imm. 2-mut:

Aalajangersakkap erseqqissarpaa naatsorsuutit saqqummiunneqarnerani kommunalbestyrelsip inissisimaneq. Naatsorsuutit imm. 1 naapertorlugu aningaasaqarnermut ataatsimiititaliami saqqummiunneqartussaammata, taamaaliornikkut kommunalbestyrelsimi aalajangiinissamut periaatsit aqutigissanngilaat. Akerlianik kommunalbestyrelsip taamaallaat isummerfigissavaa, kommunalbestyrelsip kissaatigissappagu naatsorsuutini immikkoortut imaluunniit naatsorsuutitut kukkunersiorneqarnerannut atatillugu oqaaseqaatit, tamatumalu kingorna kukkunersiuisunut aammalu Naalakkersuisunut nassiunneqartassallutik.

Imm. 3-mut:

Aalajangersakkakut aalajangerneqarpoq naatsorsuutit saqqummiunneqarneranut Naalackersuisut sukumiinerusumik aalajangersagaliortassasut ilaatigut naatsorsuutit saqqummiunneqarnissaanut killissarititaq ilanngullugu.

§ 48-mut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 47-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm 1-imut:

Kukkunersuisut akuersissutigineqarneranut tunngasup § 49, imm. 1-ip allanngortinneqarnerata kinguneranik aalajangersagaq allanngortinneqarpoq, taamaalilluni piumasaqaat kukkunersuisut “naalagaaffimmit akuerisat” peerneqarluni.

Aalajangersakkami aalajangerneqarpoq siusinnerusumi aalajangersakkamut sanilliullugu, kommunalbestyrelsi oqaaseqaatinut isummerlunilu naatsorsuutitut naggataarutaasumik akuersissasoq. Aalajangersagassatut siunnersuut malillugu kommunalbestyrelsip kukkunersuisut oqaaseqaataasa akineqarnissaa allaffeqarfimmut ataatsimiititalianulluunniit isumagisassanngortissinnaanngilaa.

Ukiup naatsorsuiffiup ingerlanerani kukkunersiuineq pillugu § 49-mut, imm. 3-mut 5-imullu oqaaseqaatit innersuussutigineqarput.

Imm. 2-mut:

Kommunalbestyrelsip aalajangernera kukkunersuisullu oqaaseqaataat nakkutilliisutut oqartussanut nassiunneqartassapput, siunissami nakkutilliisutut oqartussat aamma Kommunit Nakkutilliisoqarfiata immikkoortinneqarnissaasa kingunerannik.

Imm. 3-mut:

Takuneqarsinnaanera arlalitsigut qulakkeerneqarsinnaavoq minnerpaamilli allaganngorlugu takuneqarsinnaanngorlugu kommunip allaffiani, kiffartuussiveqarfinni, nunaqarfinni allaffinni assigisaanilu saqqumitinneqartassaaq.

§ 49-mut

Maannamut § 48-mut naleqqiullugu aalajangersagaq makkuninnga allannguutinik imaqarpoq: Maannamut § 48, imm. 1 atuuttoq allanngortinneqarpoq, taamaalilluni kukkunersuisut naalagaaffimmit akuerisat atorneqarnissaanik piumasaqaat taarserneqarluni kukkunersiusarnek pillugu inatsimmi qaqugukkulluunniit atuuttoq naapertorlugu kukkunersuisut akuerisat atorneqarnissaannik piumasaqaammik. Allannguut tunngaveqarpoq BDO-p – Kommunernes Revision - tusarniuummum akissutaani kissaatigineqarsimammat taamaalineqassasoq.

Maannamut kukkunersiuinermut inatsit 468-iuvoq 17. juni 2008-meersoq. Kukkunersuiusunut akuerisaasunut inatsit aamma Kukkunersiusutut suliffeqarfiit. (Revisorlov) Inatsit Kalaallit Nunaannut atuutilerpoq aqqutigalugu Anordning om ikrafttræden for Grønland af lov om statsautoriserede og registrerede revisorer.

Imm 1-mut:

Kukkunersuiusunut immikkut piumasaqartoqanngilaq taamaallaalli kukkunersuisarneq pillugu inatsit qaqugukkulluunniit atuuttoq naapertorlugu Naalackersuisuniillu akuerisaasimassapput.

Imm. 2-mut:

Kommunip kukkunersuisuisa akisussaaffigaat misissussallugu nalinginnaasumik aamma immikkut naatsorsuinermit kukkunersiuinermullu aalajangersakkat malinneqarnersut.

Imm. 3-mut:

Aalajangersakkap kukkunersuiusut nalunaaruteqaqqaaratik karsi misissussallugu aammalu kommunip naatsorsuuserinikkut ingerlatsinera sukumiisumik misissussallugu aammalu misissuinermit periaatsini kommunip atulersimasaani suleriaatsip eqqortup qulakkeerneqarnissaa anguniassallugu.

Imm. 4-mut:

Aalajangersakkakkut erseqqissarneqarpoq kommunalbestyrelsi kukkunersuiusuinut paasisitsinissamik pisussaaffeqaannangitsoq aammali uppernarsaanissamik pisussaaffeqartoq. Kingulliullugu taaneqartumi kukkunersuiusut namminneerlutik uppernarsaatissanik ujaasisarnissaannut pingaaruteqarpoq. Paasissutissat pisariaqartut tassaasinnaapput naatsorsuutini allattuinermit ilanngussat imaluunniit angalanermit aningaasartuutit.

Imm. 5-mut:

Aalajangersakkakkut erseqqissisinnerneqarpoq kukkunersuiuermit oqaaseqaatit kukkunersuiuermit ingerlaavartunut atatillugu tunniunneqarsimasut ukiumut naatsorsuutit kukkunersiorneqarneranni oqaaseqaatit suliarineqartassasut.

§ 50-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 49-mik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm 1-imut:

Aalajangersakkami aalajangerneqarpoq kommunabestyrelsi pisussaaffeqartoq kommunip karseqarneranik aamma naatsorsuuserinermik ingerlatsineranik aaqqissuussineq suliallu

ingerlasarnerat pillugit maleruagassiornissamut, kukkundersiuisunut nassiunneqartussamik. Kommunalbestyrelsittaag pisussaavoq allannguutit atuutilinnginneranni maleruagassat allannguutaasa kukkundersiuisunut nalunaarutiginnissaat.

Imm. 2-mut:

Aalajangersagaq maannamut atuuttumut iluarsisamut § 49 imm. 2-mut naapertuuppoq, siunertaralugulu qulakkiissallugu kommunit kontolersuinerinut, naatsorsuutit saqqummiunneqarnerinut aammalu kukkundersiuisut suleriaasaannut aalajangersakkanik assigiiaartunik suliaqartoqarsinnaasoq.

Assigiiaartumik aalajangersagaqarnerup siunertaraa minnerunngitsumik qulakkiissallugu assersuunneqarsinnaasunik aningaasaqarnikkut pissutsinik paasissutissanik tunniussisoqarsinnaaqullugu, kommunit suliaasa ingerlanneranut atatillugu.

Taamaattut aalajangersakkat pingaarutillit ilaat missingersuusiordermi aamma naatsorsuusiordermi periaatsini pioreersumi nassaassaareerput, maanna Kanukoka-p Namminersorlutik Oqartussat sinnerlugit aqutaanni. Pisortatigoortumik nalunaarut aqqutigalugu aalajangersakkami malittarisassat kommuninit saneqqunneqarsinnaajunnaassapput, taamattaag aalajangersakkat assersuutigalugu piffissamik killiliinernik ilassuteqartinneqarsinnaapput.

§ 51-imut

Maannamut § 50-imut naleqqiullugu aalajangersagaq makkuninnga allannguutinik imaqarpoq:

Maannamut § 50, imm. 3 atuuttoq allanngortinneqarpoq tamatumalu nassataanik oqaasertai iluarsineqarlutik.

Imm 1-imut:

Aalajangersagaq maannamut atuuttumut § 50, imm. 1-imut naapertuuppoq. Nunaqarfiit sorliit ataatsimut nunaqarfimmi aqutsisoqassasut kommunalbestyrelsip nammineq aalajangissavaa, aammattaag nunaqarfimmi aqutsisut pingasunik ilaasortaqaassanersut imaluunniit tallimanik ilaasortaqaassanersut kommunalbestyrelsip nammineerluni aalajangissavaa.

Imm. 2-mut:

Aalajangersagaq nutaajuvoq ilanngunneqarnissaalu siunnersuutigineqarpoq nunaqarfiit amerlasuunik innuttaqartut imaluunniit avinngarusimasuniittut immikkut akuersissuteqarfigineqarsinnaasut ataatsimoorussamik nunaqarfinni aqutsisoqarnermut tunngatillugu. Immikkut akuersissut kommunalbestyrelsimit Naalakkersuisunut qinnuteqareernikkut tunniunneqartassaaq, Naalakkersuisut piunasaqaatit naammassineqarsimasutut isumaqarfigippatigit.

Imm. 3-mut:

Aalajangersagaq maannamut aalajangersakkamut naleqqiullugu allanngortinneqarpoq. Tulluartautinneqanngilaq nunaqarfiit aqutsisuisa siulittaasuannik qinersinermi sukumiisunik maleruagassiukkamik periaaseqartoqarnissaa, tamatumani qinersinermi nunaqarfiit aqutsisuisa ilaasortaasa ikinneri pissutigalugit borgmesterimut qinersinermi pingaartorsiorpalunnginnerusumik ingerlanneqarsinnaassammat.

Nunaqarfiit aqutsisuinut kikkut qinerneqarsinnaaneriniq aalajangersakkat kommuninut qinersinermi inatsisikkut aalajangersarneqarput.

Imm. 4-mut:

Nunaqarfinni aqutsisut kommunalbestyrelsimi pisinnaatitsineq naapertorlugu sulipput. Aalajangersagarli kommunalbestyrelsi qanoq atsigisumik pisinnaatitsisinnaaneranut nassuiaanissamut tunngassuteqartuni annertuumik nalornisitsisarpoq. Pingaartumik nalornissutigineqartarpoq kommunalbestyrelsi aningaasaliissutinik qanoq amerlatigisunik atuinissamik nunaqarfinnut pisinnaatitsisinnaanersoq. Tamatuma kingunerisaanik nunaqarfinni aqutsisut pisinnaatitsissummik tunineqarpata kommunalbestyrelsi allaffissornikkut nukissat nunaqarfiit aqutsisuinut qulakkeertussaavai, kommunalbestyrelsi nunaqarfinni aqutsisunik nakkutilliisussaataitanera pissutigalugu.

Kommunalbestyrelsi nunaqarfinni aqutsisunut aalajangiisinnaanermik pisinnaatitsissummik tunniussaartoq allaffissornikkut suliassanik naammassinnissinnaanermik qulakkeerinnissimangitsoq siunnersuummi kapitali 9 naapertorlugu akisussaatinneqarsinnaavoq.

§ 52-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 51-imik ingerlatseqqinneruvoq imarisamigullu allannguuteqanngilaq.

Imm. 1-imut:

Aalajangersagaq suleriaasissamut minnerpaanik piunasaqaatinik arlalinnik saneqqunneqarsinnaanngitsunik atuutilersitaqarpoq.

Tunngaviusumik ingerlatsinikkut malitsitsinermi periaatsit pineqartut tassaapput ingerlatsinermi inatsisip piunasaqaatai naapertorlugit suliat.

Kommunalbestyrelsimi sulinertut nunaqarfinni aqutsisut atuunnerat pillugu periaatsinik aalajangersakkanik sukumiisunik atuutitsisoqarnissaa tulluartausorinangilaq.

Aalajangersagaq aamma periarfissiivoq nunaqarfimmit nunaqarfimmut pissutsit assigiinngiiaartorujussuusut kommunalbestyrelsit pitsaanerusumik sillimaffigisinnaalernissaannut. Nunaqarfinni aqutsisut suleriaasissaasa aalajangersarneqarnerat kommunalbestyrelsimi suliarineqassaaq, takussutissaassallunilu nunaqarfiit annertunerusumik aalajangiisinnaanermik pisinnaatinneqarneriniq, taamaattumillu allaffissornikkut suleriaatsinik erseqqissunik nunaqarfinni aqutsisut sulinerannut

aalajangersagaqarnissaq pingaaruteqarpoq, aalajangersakkanut kommunalbestyrelsip nammineerluni periaasiinut ataqatigiissaarneqarsimasunik.

Nunaqarfinni aqutsisut suleriaasissaasa aalajangersarneqarnerannut atatillugu nunaqarfinni aqutsisut tusarniaaffigineqarsimasariaqarput, tak. § 53.

Nunaqarfinni aqutsisuni ilaasortat akissarsiaqartinneqarnerat § 56 naapertorlugu ingerlanneqartassaaq.

Imm. 2-mut:

Aalajangersagaq nalinginnaasumik suliarnut attuumassuteqarneq pissutigalugu aalajangeeqataasinnaanginnermut aalajangersagaavoq, ilanngunneqarlunilu nunaqarfinni aqutsisut annertunerusumik pisinnaatinneqarnissaannik ilimasuuteqarnerup kingunerisaanik.

Imm. 3-mut:

Aalajangersagaq imaqarpoq kommunalbestyrelsimi ataatsimiititaliani ikinnerussuteqartut pisinnaatitaaffii pillugit nunaqarfinni aqutsisuni ilaasortanut aamma atuutinneqarnissaanik qulakkeerinnimmat, tak. § 30.

Aalajangersagaq taamaallaat atuuppoq suliassani nunaqarfinni aqutsisunut aalajangiisinnaanermik oqartussaaffilerneqarsimasuni. Suliassani nunaqarfinni aqutsisut siunnersuummi § 53 nassataanik, tak. ataanniittoq, kommunalbestyrelsimut innersuussummik imaluunniit tassunga oqaaseqaateqartoqartillugu, nunaqarfinni aqutsisut ikinnerussuteqartut ikinnerussuteqarluni oqaaseqaammik imaqarniliarnut ilanngussisinnaatitaaneq atorsinnaavaat.

§ 53-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 52-imik ingerlatseqqinneruvoq imarisamigullu allannguuteqanngilaq.

Aalajangersakkakut aalajangersarneqarpoq nunaqarfinni aqutsisut nunaqarfimmi pissutsinut attuumassuteqartuni kommunalbestyrelsimut innersuussutinik nassitsisinnaatitaaffeqarnerinik. Aammattaq aalajangersakkap kommunalbestyrelsi pisussaaffilerpaa kommunalbestyrelsimi suliassani nunaqarfinni pissutsinut attuumassuteqartuni suliaqarni nunaqarfinni aqutsisut tusarniaavigineqartarnissaannik.

§ 54-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 53-imik ingerlatseqqinneruvoq, oqaasertai allannguuteqarput imarisamigullu allannguuteqanngilaq.

Imm. 1-imut:

Aalajangersakkakut aalajangerneqarpoq nunaqarfinni aqutsisut aatsaat aningaasartuuteqarsinnaasut kommunalbestyrelsip aningaasaliissuteqareerneratigut.

Aalajangersagaq § 44, imm. 2-mut attuumassuteqarpoq kommunalbestyrelsimi aningaasaliisinnaanermut pisinnaatitaaffimmik aalajangersaasumik.

Taamaalilluni kommunalbestyrelsit nunaqarfinni aqutsisunut aningaasaliisinnaanngillat pisinnaatitsissutip imm. 2 naapertorlugu tunniunneqarsimasut avataasigut.

Imm. 2-mut:

Aalajangersakkami siullertut nalunaarpaa, kommunip missingersuusiatigut nunaqarfinni aqutsisut ingerlatsinikkut aningaasaliiffigineqarsinnaasut. Aalajangersakkap aappaattut nalunaarpaa aningaasaliissutaasunik nunaqarfinni aqutsisut atuisinnaatitaanerat.

Aalajangersakkamili aalajangerneqanngilaq nunaqarfinni aqutsisunut allaffissornikkut pisinnaassuseq qanoq annertutigisoq pisinnaatitsissutigineqarsinnaanersoq, tamanna aalajangerneqassammat § 51, imm. 4 aallaavigalugu. Illuatigulli atuisinnaatitaaneq pisariaqartitsivoq, soorlu imm. 1 naapertorlugu ingerlaannartumik aalajangiisinnaanermik pisinnaatitsinerup kingunerissagaa atuisinnaatitsineq pissasoq aningaasaliissutaasutut killigititaasut iluanni.

Taamaalilluni massakktulli nunaqarfiit aqutsisunut aalajangiisinnaatitaanermik tunniussisoqarsinnaavoq aningaasaqarnikkut akisussaaffeqarnermik malitseqanngikkaluartumik. Nunaqarfinni aqutsisut aningaasaliissutit atorneqarsinnaatitaasut nungullugit atorsimalerpatigit, aalajangiisinnaassuseq aningaasaliissutaasunut taakkununga attuumassuteqartoq taamaalilluni aamma atortussaajunnaassaaq.

Kommunalbestyrelsili, soorlu nalunaarneqartut iliuuseqarsinnaassusermik annertunerusumik imm. 2 naapertorlugu aningaasatigut pisinnaatitsineq qaangerlugu tunniussinnaassavaa imaluunniit aningaasanik atorneqarsinnaasunik amerlanerusunik ilassutitut aningaasaliissuteqarsinnaalluni. Tamannali qaqutigunnaq pisinnaasariaqarpoq, siunertammat aningaasanik atorneqarsinnaasunik illikartitsinerup nunaqarfinnut allaffissornikkut oqilisaassutaanissaa sinaakkuteqarluni aqutsinerup atulerneratigut.

Sinaakkuteqarluni aqutseriaatsimut akerliussaaq aqutsinikkut ingerlanerliorneq pissutigalugu aalajangiisinnaassusermik tunniussinikkut ingerlanerliorneq akissarsissutaassappat. Aningaasat atorneqarsinnaatitaasut ingerlatsinerliorneq pissutigalugu nungunneqarpata tamatigut kingunerisariaqarpaa ilassutissanik aningaasaliissuteqaqqittoqannginnera aammalu ilassutaasumik aalajangiisinnaassusermik tunniussisoqaqqinnginnera.

Aningaasaliissutit sinaakkutaat tikillugit atuineq pisassaaq pineqartumik inatsisiliornermi killiliunneqartut iluanni. Tamatumani pingaaruteqarput kultureqarnermut aamma qaammarsaanerup kiisalu isumaginninnerup tungaatigut attuumassuteqartuni aningaasanik atuisinnaatitsissutissanik illuartitsisarnerit.

Imm. 3-mut:

Aalajangersakkap siunertaraa nunaqarfinni aqutsisut suliaannik kommunalbestyrelsip ilisimasaqarnissaa qulakkiissallugu.

Nunaqarfinni aqutsisut suleriaasissaanni ilassutaasunik ilanngussisoqarsinnaassaaq uppersaasatit misissorneqartarneranni iliuusissanik annertunerusunik, aamma imm. 2 naapertorlugu taaneqartuni nunaqarfik aningaasatigut piginnaatinneqarsimanngikkaluartoq.

§ 55-*imut*

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 54-imik ingerlatseqqinneruvoq imarisamigullu allannguuteqanngilaq.

Imm. 1-*imut*:

Aalajangersakkap naqissuserpaa nunaqarfinni aqutsisut siulittaasuat tassaasoq nunaqarfinni aqutsisut ingerlatsinerannut akisussaasuusoq. Inatsimmi innersuussutigineqarput inatsimmi matumani malittarisassat aammalu pisortat ingerlatsineranni suliat suliarineqartarnerat pillugu Inatsisartut inatsisaannut aammalu pisortat ingerlataanni ammasumik ingerlatseriaaseqarneq pillugu inatsit.

Aalajangersakkap aamma kingunerissavaa nunaqarfinni aqutsisut siulittaasuata kommunalbestyrelsimut attaveqaatitut atuuttuaannartussaana.

Imm. 2-*mut*:

Aalajangersagaq nutaajuvoq ilanngunneqarnissaalu siunnersuutigineqarluni erseqqissarniarlugu kommunalbestyrelsi nunaqarfinni aqutsisunik nakkutilliisuusussaasoq. Massakkumut nakkutilliisuutitatut oqartussat nunaqarfinni aqutsisunik toqqaannartumik nakkutilliinissaminnik periarfissaqassanngillat kisiannili nakkutilliineq kommunalbestyrelsi aqqutigalugu ingerlattussaallugu. Naalakkersuisut nunaqarfinni aqutsisut suliaannik paasisaqarusullutik kissaateqarpata tamanna kommunalbestyrelsi aqqutigalugu pisassaaq. Kommunalbestyrelsi nunaqarfinni aqutsisunut pisinnaatitsisuuvoq, kisiannili taamaaliornikkut suliat, aningaasaliissutit aamma pisinnaatitsissutit naapertorlugit ingerlanneqarnerannik akisussaaffimmik tunussisinnaanngilaq.

§ 56-*imut*

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 55-imik ingerlatseqqinneruvoq, oqaasertai allannguuteqarput imarisamigullu allannguuteqanngilaq.

Imm. 1-*imut*:

Aalajangersakkami ersarissarneqarpoq nunaqarfinni aqutsisut aningaasarsiaqartinneqarnerat kommunalbestyrelsip akisussaaffigaa Naalakkersuisut sinaakkutissatut aalajangersagaat tunngavigalugit. Maannakkut inatsimmi § 56 imm. 6 innersuussutigineqartoq kukkuneruvoq eqqortorli tassaavoq § 65. Siunnersuummi innersuussutigineqarpoq aningaasarsiaqartitsinermi aalajangersagaq § 66 imm. 6.

Imm. 2-*mut*:

Ilassutitut akissarsiat kommunalbestyrelsimit akuerineqartut ataasiakkaat nalilersuiffigereernerisigut tunniunneqarsinnaapput. Naliliinerni siulittaasup akisussaaffia aamma suliaqarnikkut nammatai immikkut isiginiarneqartassapput.

Imm. 3-mut:

Naartunermi, erninermi meeravissiarthaarnermilu inatsit tamatumunnga tunngasoq naapertorlugu nunaqarfinni aqutsisut sulinngiffeqarnissamut pisinnaatitaapput akissarsiaminnik annaasaqaratik.

§ 57-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 56-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Naalackersuisut kommunit ingerlatsinerinik nakkutilliisuussapput. Naalackersuisut kommuniniit aqutsinermut ileqqoreqqusat tigusaavaat, tak. § 1, imm. 4, kommunalbestyrelsip qaqugu sumilu ataatsimiinnissaanik ilisimatinneqartassallutik, tak. § 8, imm. 1 aamma 3, kommunalbestyrelsip matoqqasumik ataatsimiinnerani peqataatitaqarsinnaallutik tak. § 9, imm. 4, aamma Naalackersuisut kommunalbestyrelsit ataatsimiinnerannit imaqarnilianik tigusaqartartussaapput tak. § 16, imm. 4, kiisalu Naalackersuisut ilisimatinneqartassapput kukkunersuisut nalunaarutaannut akissuteqaaatit pillugit, tak. §§ 47 imm. 2 aamma 48, imm.2.

Imm. 2-mut:

Aalajangersakkami aalajangerneqarpoq immikkut naammagittaalliornissamut periarfissaqartoqartillugu imaluunniit suliani aalajangersimasuni nakkutilliinermik oqartussaqaqartoqartillugu Naalackersuisut pineqartuni nakkutilliisuusinnaassanngitsut. Assersuutigalugu taaneqarsinnaavoq inunnik isumaginninnermi inatsit naapertorlugu Isumaginninnermi sulianut Naammagittaalliuuteqartarfimmi aalajangiiffiusimasumi naammagittaalliuutigineqarsimasut taamaalilluni nakkutilliisuutitatur oqartussaasunut anngunneqarsinnaasarnatik.

Imm. 3-mut:

Aalajangersakkami aalajangerneqarpoq Naalackersuisut nakkutilliisussaataitanerata atorfinitsitsinermi malittarisassat pineqartillugit atuutinnginnera erseqqissarniarlugu. Apeqqutit atorfinitsitsinermi malittarisassanut tunngasut pineqartillugit tamakku atorfinitsitsisarnernik isumaginnittunut innersuunneqartassapput.

§ 58-imut

Aalajangersagaq manana kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 57-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Aalajangersakkami aalajanernejarpog Naalakkersuisut nakkutilliinerannut atatillugu atortut kommunalbestyrelsimit piumasarineqartut pinngitsoorani tunniuneqartartussaanagerat erseqqissarniarlugu. Kommunalbestyrelsi aamma pisussaavoq nakkutilliisuutitatu oqartussanut uppersaait piumasarineqartut tamaasa tunniuttassallugit, pineqartut qanorluunniit iluseqaraluarpata.

Imm. 2-mut:

Kommunit aningaasaqarnikkut ingerlatsinerini immikkut pisoqartillugu Naalakkersuisut misissuinissaminut periarfissaqaqqullugit aalajangersagaq periarfissiivoq.

Imm. 3-mut:

Aalajangersagaq nutajuvoq, siunnersuutaallunilu ilanngunneqassasoq sulianik pilertornerusumik Naalakkersuisut Kommunit Nakkutilliisoqarfiannut apuussisinaanerat periarfissaqaqqullugu, piffissaliussap kissaatigineqartup iluani Naalakkersuisut nakkutilliinermut atatillugu uppersaatiniq tigusaqarsimatinnagit. Piffissamik aalajangiineq pisut ataasiakkaat naapertorlugit ingerlanneqartassaaq aammalu suliap qanoq paasiuminartiginera sumiiffimmilu sumi inissisimanagera apeqqutaatillugit.

Imm. 4-mut:

Aalajangersakkami qulakkeerneqassaaq kommunalbestyrelsip suliaminnik paasissutissiineranut atatillugu sulinerup iluani Naalakkersuisunut suliamut tunngatillugu paasissutissat nassiunneqarsinnaasut suliamut tunngasut innarlinngikkaluarlugit taamaasillutillu piunasaqaatigineqarpata allagaatinik takunnissinaanermik qinnuteqarnermi tunniunneqarsinnaangorlutik.

Imm. 5-imut:

Aalajangersakkap qulakkiissavaa nakkutilliinermi suliamut imaluunniit suliarineqarusuttumut tunngasuni ilisimasaqassutsip aammalu suliami paasissutissat eqqortut paasissutissiissutigineqarsinnaaqqullugit. Nakkutilliisutut oqartussat assersuutigalugu akileraartarnermi paasissutissanik oqartussanit attuumassuteqartunit piunasaqartarsinnaassapput.

§ 59-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 58-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Aalajangersakkami aalajangerneqarpoq Naalakkersuisut nakkutilliisussaannermik suliaqartut, taamaalillunilu taamaallaat suliap suussusia naapertorlugu Nakkutilliisoqarfimmut suliassanngortinneqassasoq Naalakkersuisut aalajangersinnaallugu kinguneqartitsisoqarluni pineqaatissiisoqarnissamik isumaliuteqarnissaq siunertaralugu.

§ 60-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 59-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Aalajangersakkakut aalajangerneqarpoq Nakkutilliisoqarfiup katiterneqarnerata qulakkiissagaa ingerlaavartumik sulinerup Naalakkersuisunut Inatsisartunullu annertuumik attuumassuteqannginnissaa.

Imm. 2-mut:

Nalinginnaasumik nalunaarneqarpoq ilaasortap peqataasinnaannginnerani sinniisussap aggersarsinnaaneraniq periarfissaqarnera aammattaaq aalajangeeqataasinnaannginnermi sinniisussap aggersarneqarsinnaanera. Sinniisussat toqqarneqarnerini imm. 1-imi pineqartuni oqaasissaqartitaasut aamma ilaasortanik nalinginnaasunik toqqaasuusut toqqaasuussassapput.

§ 61-imut

Imm. 1-imut:

Aalajangersakkami massakut atuuttumi § 60, imm. 1-imi minnerpaamik ukiumut ataasiarluni ataatsimiittoqartarnissaanik aalajangersasagaq siunnersuutigineqarpoq allanngortinneqassasoq, taamaalilluni Nakkutilliisoqarfiup aalajangersimasumik qanoq akulikitsigisumik ataatsimiittarnissaa aalajangersaaffigineqarani. Misilittakkat naapertorlugit pisariaqartinneqanngilaq nakkutilliisoqarfiup aalajangersimasumik akulikissusilimmik ataatsimiittarnissaa, aamma misilittagarineqarpoq ajornakusoortoq inatsimmi piumasaasoq malillugu ukiut tamaasa ataatsimiittoqartarnissaa. Inatsisissamut siunnersuummi eqaannerusumik suleriaasissamik pilersitsisoqarpoq, taamaasilluni Nakkutilliisoqarfik pisariaqartillugu naapittarsinnaalissapput, siulittaasup imaluunniit ilaasortat pingasut pisariaqartitsinerat tunngavigalugu.

Imm. 2-mut:

Siulittaasoq ataatsimiinnernut ilaasortanik aggersaasussaataavoq aammalu piffissamik sumilu ataatsimiittoqarnissaanik aalajangiisussaalluni.

Imm. 3-mut:

Aalajangersakkakut aalajangersarneqarpoq siulittaasoq pisussaasoq ataatsimiinnermi suut suliarineqassaneriniq Nakkutilliisoqarfiup ilaasortai ilisimatissallugit aammalu paasissutissat suliassanut attuumassutillit nassiussorneqarnissaat isumagissallugu.

Imm. 4-mut:

Nakkutilliisoqarfiup siulittaasuata ataatsimiinnermi aalajangernerit imaqarniliorneqarnissaat pisussaaffigaa ataatsimiinnerit tamarnik naammassinerisa kinguninnguagut erngertumik ilaasortanit peqataasunit atsiorneqartartussamik. Nakkutilliisoqarfimmi ilaasortaq kinaluunniit imaqarniliamut allaanerusumik isumaqarnerminik ilanngussisinnaatitaavoq, soorlu kommunalbestyrelsimi ilaasortat pisinnaatitaaffiat § 16, imm. 1 naapertorlugu.

§ 62-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 61-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Aalajangersakkami aalajangerneqarpoq Nakkutilliisoqarfik aalajangiisinnaassuseqartoq, Nakkutilliisoqarfiup siulittaasua aammalu minnerpaamik ilaasortat marluk najuuppata.

Imm. 2-mut:

Aalajangersakkami aalajangerneqarpoq aalajangernerit amerlanerussuteqarnikkut pisassasut. Aamma aalajangersakkakut aalajangerneqarpoq taasinerni naligiittoqartillugu siulittaasup taasinera aalajangiisuusassasoq.

Aalajangersakkakuttaaq aalajangerneqarpoq Nakkutilliisoqarfiup ilaasortaata kialuunniit aalajangerniarnerup ingerlanneqarnera unitsissinnaagaa suliaq Naalakkersuisunut tamarniusumut aalajangigassanngoqqullugu piunasaqarnermigut.

Imm. 3-mut:

Aalajangersakkakut erseqqissarneqarpoq kommunimi kommunalbestyrelsimut ilaasortaaffigisami pissutsit Nakkutilliisoqarfimmi oqaluuserineqartillugit tamanna suliassanut attuumassuteqarneq pissutigalugu aalajangeeqataasinnaajunnaarnermik kinguneqartassasoq.

§ 63-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 62-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Aalajangersakkap Nakkutilliisoqarfiup siulittaasua suliarineqartuni
apeqquuserneqarsinnaanngitsuni suliarineqartunilu kinguartinneqarsinnaanngitsuni
aalajangiisinnaanngorlugu pisinnaatippa.

Aammattaaq aalajangersarneqarpoq Nakkutilliisoqarfiup siulittaasuata Nakkutilliisoqarfiup
aalajangigaasa piviusunngortinneqartarnissaat akisussaaffigaa.

Imm. 2-mut:

Nakkutilliisoqarfiup siulittaasuata aalajangigai Nakkutilliisoqarfiup ataatsimiinnerani
tulliuttumi saqqummiunneqartassapput.

Imm. 3-mut:

Aalajangersakkami ersersinneqarpoq Nakkutilliisoqarfiup allattoqarfia Naalakkersuisunit
toqqarneqassasoq, taamaattorli Naalakkersuisut allaffissorneranni ilaatinneqarnissaat
pisariaqanngitsoq.

Allattoqarfiup sulinermini Naalakkersuisunut pituttorsimanninnissaa
naatsorsuutigineqarpoq, taamaallillunilu Nakkutilliisoqarfiup siulittaasuanut taamaallaat
attuumassuteqarluni aammalu ingerlatsinermi aalajangersakkat nalinginnaasut
tunngavigalugit suliasani ataasiakkaani suliasallu aalajangersimasut ilaanni allattoqarfik
sinnerluni aalajangiisinnaanngorlugu kissaateqartarsinnaalluni.

§ 64-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5.
december 2008-meersumi atuuttumit § 63-imik ingerlatseqqinneruvoq imarisamigullu
allannguuteqanngilaq.

Aalajangersakkami aalajangerneqarpoq Nakkutilliisoqarfiup sulinerani aningaasartuutit
landskarsimit akilerneqartassasut.

§ 65-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5.
december 2008-meersumi atuuttumit § 64-imik ingerlatseqqinneruvoq imarisamigullu
allannguuteqanngilaq.

Imm. 1-imut:

Aalajangersakkap naqissuserpaa, kommunalbestyrelsip, aningaasaqarnermi ataatsimiititaliap
imaluunniit taakkua ilaasortaannit imaluunniit ataatsimiititaliap ataavartup, imaluunniit
taassuma ilaasortaannit aalajangiinerit inatsisinik unioqqutitsisut/saneqqutitsisut
Nakkutilliisoqarfiup atorunnaarsissinnaagai.

Imm. 2-mut:

Aalajangersakkap Nakkutilliisoqarfik periarfissippaa erseqqinnerusumik piumasarisat arlallit tunngavigalugit kommunimi aalajangikkamik atorunnaarsitsigallarsinnaangorlugu, tassa imm. 1 naapertorlugu atorunnaarsinneqavissaneranik aalajangerneqarnissap tungaanut.

Aalajangersagaq atulersinneqarpoq kommunip aalajangenera inatsisinik tulluartumik eqqortitsilluni aalajangiisoqarsimaneranik paasiniaanissamut Nakkutilliisoqarfik pisariaqartitaanik piffissalerumallugu, tassa aalajangernerup piffissap ingerlanerani piviusunnngortinneqarsimanerata kinguneranik atorunnaarsitsisariaqalernissaq pinngitsoorumallugu.

Malittarisassakkut peqqussutigineqarpoq aalajangigaq piviusunnngortinneqarsimasoq taamaallaat atorunnaarsinneqarsinnaasoq piumasarisat erseqqinnerusumik tunngavissiissutit malillugit, tamannalu pissuteqarpoq aalajangigaq piviusunnngortitaasimasoq aallaavittut innuttaasunit tatigineqarsinnaasariaqarmat.

Aalajangikkat piviusunnngortinneqarsimasut atorunnaarsinnissaannut inerteqqut taamaattoq isumaqarfigineqarpoq killilertariaqartoq soorlu pissutsit nr.1-imiitut 2-miittullu naammassineqarsimagaangata. Taamaalilluni tunngavissaqanngilaq ingerlatsinermi aalajangikkap inatsisitigut eqqunngitsup innuttaasup eqqunngitsuliorfigineqarsimasup atorunnaarsikkumallugu kissaatigisaata atorunnaarsikkallarnissaanut inerteqquteqarnissaq. Taamatut pisoqartillugu maalaaruteqarfissaqanngippat pingaarutilinnillu allanik mianerisassaqanngippat pingaartumik inuttaasunik allanik, aalajangernermik piviusunnngortitsinerup kommunalbestyrelsip atorunnaarsitsinissaa piviusunnngortittariaqanngilaa, taamaaliornikkullu innuttaasup inatsisitigut inissisimane pitsaannginnerulersillugu.

Innuttaasumit atorunnaarsitsinissamik imaluunniit atorunnaarsitsigallarnissamik piumasaqaatit allagaanissaat piumasarineqarmat nalinginnaasumik ingerlatsiveqarfinit aalajangernerit iluaqusiisut piviusunnngortinneqarsimasullu atorunnaarsinnissaat pisariaqanngilaq.

§ 66-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 65-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Akissarsiat aalajangersimasut annertussusiisa aalajangersarneqarneranni sapinngisamik qulakkeerneqassaaq inuussutissarsiummik namminersorluni ingerlataqartunut aamma namminersorlutik inuussutissarsiortuni sulisorisanut aamma pisortani oqartussani sulisorisanut kommunimi naalakkersuinikkut ingerlatseqataarusunnerup kajungernartuunissaa tunngavigineqassasoq. Taamatuttaaq soorunami suliassat annertussusiat aningaasarsiani aalajangersimasuni isiginiarneqarluni ilaatinneqassaaq. Nalunaarummik suliaqartoqareerpoq Borgmesterinik borgmesterillu tulliinik kiisalu kommunabestyrelsinut nunaqarfinnillu aqutsisunut ilaasortanik il.il. akissarsiaqartitsineq pillugu Namminersornerullutik Oqartussat

nalunaarutaat nr. 29, 18. december 2008-meersoq tassanilu aningaasarsiat annertussusiat takuneqarsinnaavoq.

Imm. 2-mut:

Aalajangersakkami kommunalbestyrelsi periarfissinneqarpoq ataatsimiititaliat ataavartut siulittaasuinut naliliinerit ataasiakkaat tunngavigalugit akissarsianik ilassutissanik aalajangersaasinnaaneranik. Aalajangersagaq eqqarsaatigineqarpoq atorneqartassasoq siulittaasoq suliassanik nalinginnaasutut suliarineqartussanit immikkuullarissuteqartunik suliaqaraangat.

Imm. 3-mut:

Aalajangersakkap qulakkeerpaa akissarsiat aalajangersimasut sinniisunut nuunneqarsinnaanerat, sinniisoq kommunalbestyrelsimi sivikinnerpaamik qaammatinik marlunnik ilaasortaasimatillugu, ilaasortap aalajangersimasup peqannginnera § 15, imm. 1-imut imaluunniit § 15, imm. 2-mut innersuussutigineqaraluarpuunniit.

Imm. 4-mut:

Aalajangersagaq atuuttuavoq kommunalbestyrelsimut ilaasortanut, ataatsimiititaliani ataavartuni sivikinnerpaamik qaammatini 2-ni siulittaasuuffeqartunut.

Imm. 5-imut:

Aalajangersakkami qinigaasut atuuffimmut tunngatillugu angalanermik ingerlataqartut, qanorluunniit akissarsiaqartinneqaraluarpata, najugaqarnermut angalanermilu aningaasartuutitut taartisiaqartarnermik pisinnaatitaanermik periaaseq nalinginnaasoq ingerlateqqinneqarpoq.

Aalajangersagaq pingaaruteqarpoq kommunalbestyrelsimi aamma ataatsimiititaliat ataatsimiinneranni nunaqarfimmiut peqataasarneranni. Tassungali atatillugu eseqqissarneqassaaq Naalackersuisut naatsorsuutigimmassuk kommunini ataatsimiinnerni telekkut attaveqaatit annertunerusumik atorneqalissasut.

Imm. 6-imut:

Aalajangersakkami aalajangerneqarpoq akissarsiat aalajangersimasut, akissarsianut ilassutit, ullormusiat aamma sulineri akissarsianik annaasaqarnernut matussutissat kiisalu taakkua akilerneqartarnerannut aamma missingersuusiortarnerannut aalajangersakkanik sukumiinerusunik Naalackersuisut suliaqarsinnaasut. Nalunaarummik suliaqartoqareerpoq. Borgmesterinik borgmesterillu tulliinik kiisalu kommunalbestyrelsinut nunaqarfinnillu aqutsisunut ilaasortanik il.il. akissarsiaqartitsineq pillugu Namminersornerullutik Oqartussat nalunaarutaat nr. 29, 18. december 2008-meersoq.

Imm. 7-imut:

Aalajangersakkami aalajangerneqarpoq nr. 1-imiit 5-imut akissarsiat aalajangersarneqartut tiguneqarnissaat pisussaaffiusoq.

Imm. 8-mut:

Naartunermi, erninermi meeravissiarternermilu inatsit tamatumunnga tunngasoq naapertorlugu kommunalbestyrelsit sulinngiffeqarnissamut pisinnaatitaapput akissarsiaminnik annaasaqaratik.

§ 67-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 66-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Borgmesterit akissarsiaasa aalajangersarneqartarneranni borgmesterip kommunalbestyrelsimi ilaasortatut sulinera sillimaffigineqariissaaq.

Nr. 2-mi aalajangersarneqarpoq borgmesterit tulliisa aammalu pisariaqassappat kommunalbestyrelsimi ilaasortat allat borgmesterit peqataasinnaannginnerini atuutsinneqarneri pillugit Naalakkersuisut malittarisassanik aalajangersaassasut.

Imm. 2-mut:

Aalajangersagaq maannamut atuuttumut § 66, imm. 2-mut naapertuuppoq.

§ 23, imm. 1 aamma 2 naapertorlugit borgmesterip tunuartinneqarneranut atatillugu akissarsiat annikillisinneqarnissaanut imaluunniit akissarsiaarutitinneqarnissaanut tunngasumik kommunalbestyrelsi aalajangiisinnaavoq. Aalajangiineq pissaaq naammassinnikkusunnginnerup annertussusaa qanorlu ittuussusaa mianeralugit.

Imm. 3-mut:

Kommunalbestyrelsip aalajangiinera imm. 2 naapertorlugu kommunalbestyrelsip aalajangiinera borgmesterip piunasaqarneratigut kommunalbestyrelsip eqqartuussivimmu suliassanngortissavaa.

§ 68-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 67-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

§ 69-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 68-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Aalajangersakkami aalajangersarneqarpoq Nakkutilliisoqarfiup ilaasortai akissarsiaqartinneqassasut aalajangersakkat Inatsisartunut aamma Naalackersuisunut il.il. ilaasortanut akissarsiat pillugit Inatsisartut inatsisaat naapertorlugu. Aaqquissuussineq ajunngitsumik ingerlanneqarpoq taamaattumillu allannguuteqangitsumik attatiinnarneqarluni.

§ 70-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 69-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Aalajangersakkakkut aalajangiunneqarpoq kommunalbestyrelsimi ilaasortat sulianik pineqartunit akisussaaffigineqartunik suliarinnikkusunngitsunut Nakkutilliisoqarfiup pinngitsaalisaasumik pillammik akiliisussannngortissinnaagai. Aalajangersagaq assersuutigalugu atorneqarsinnaavoq kommunalbestyrelsi § 58 naapertorlugu Naalackersuisunut paasissutissanik aammalu pappilissanik uppersaatinik tunniussiumanngippat.

Imm. 2-mut:

Aalajangersakkakkut aalajangerneqarpoq Nakkutilliisoqarfiup kommunalbestyrelsimut ilaasortanut kommunip annaasaqarsimaneranut akisussaasunut taarsiissuteqarnissaq siunertaralugu eqqartuussisunut tunniussisinaanera. Taarsiissuteqarnissamik suliasannngortitsinermut atatillugu annaaneqartut amerlassusissaannik aalajangersimasunik killiliisoqarsinnaanngilaq. Taarsiissuteqarnissamik suliasannngortitsinissami annaasaqaatit qanoq amerlatiginissaat pisuni ataasiakkaani nalilersorneqartassaaq.

Imm. 3-mut:

Aalajangersakkakkut siunertarineqarpoq taarsiissuteqartarnerni akiliisitsisarfirmik eqqartuussisutigut suliaasinissamut taarsiussinnaasumik pilersitsisoqarnissaa. Taamaakkaluartoq suliaasinissamut piumasaqaatit naammassineqarsimasussaapput, tassa imaappoq kommuni annaasaqarsimassaaq, aammalu ilaasortaq taarsiissuteqarnissaminut akisussaasuussaaq Kalaallit Nunaanni eqqartuussisarnerni aalajangersakkat nalinginnaasut naapertorlugit.

Pineqanngilaq ilaasortat akiligassap annertussusianik akisussaaqatigiillutik akiliisussaaqatigiinnissaat, akiliutissallu amerlassusissaat ilaasortanut ataasiakkaanut aalajangerneqartassallutik.

Ilaasortat arlallit akiliisussannngortinneqarpata taakkulu ilaannaasa akiliinissaq akuersaarumappassuk, taava Nakkutilliisoqarfiup suliasaq taakkununga tunngatillugu uninngatikallarsinnaavaa ilaasortanut akiliinissamik kissaateqarsimannngitsunut eqqartuussiviup aalajangiinissaata tungaanut.

Imm. 4-mut:

Aalajangersakkami malittareqquneqarpoq ilaasortaq pinngitsoorani taaseqataassasoq aalajangigassamut kommunalbestyrelsip aalajangiiffigisariaqagaanut ilaasortap nalunngeriigaanut nalunngereersimasariaqagaanulluunniit, akerlianilli ilaasortaq aalajangigassamut akerliulluni taasissasoq nalunngikkuniuk nalunngittariaqaruniulluunniit tamanna inatsisinik sanequtsinerusoq.

Ilaasortaq taasinnikkuni akisussaatinneqassaaq aammattaarli peqquteqarani ataatsimiigianngitsoorsimaguni aammalu nalunngikkuniuk imaluunniit ilisimasariaqaraluarlugu ataatsimiinnermi peqataasimagaanni unioqqutitsilluni aalajangiineq imaluunniit pinngitsoortitsineq pinngitsoorsimasinnaagaluartoq.

§ 71-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 70-imik ingerlatseqqinneruvoq, oqaasertai allannguuteqarput imarisamigulli allannguuteqanngilaq.

Imm. 1-imut:

Aalajangersagaq periarfissiivoq annaasaqarnikkut taarsiissutissanik ikililerisinnaanermik, tassa pisuussuteqarneq sakkukinnerulersitsinissamik ersersitsippat, ajoqusiinerup annertussusia pissutsillu aallat tunngavigalugit.

§ 72-imut

Aalajangersagaq maanna kommunit aqunneqarnerat pillugu Inatsisartut inatsisaat nr. 14, 5. december 2008-meersumi atuuttumit § 71-imik ingerlatseqqinneruvoq imarisamigulli allannguuteqanngilaq.

Imm. 1-imut:

Aalajangersakkakkut aalajangerneqarpoq inatsimmi matumani aqutugalugu unioqqutitsinerit annertuut pinerluuteqarnertut isigineqartussanngornerat kommunit aalajangigaannik atorunnaarsitsisarnermik atorunnaarallartitsisarnermillu, pinngitsaaliiluni akiliisitsisarnernut, inuttullu akisussaaffeqarnermut malittarisassanut siunertaqarluartumik ilassutaasoq, aammalu tassaalluni Naalakkersuisunut ilaasortat akisussaaffeqarnerannik malittarisassanut isumatusaartumik naleqqiunneqartoq.

Imm. 2-mut:

Aalajangersagaq ilanngunneqarpoq aqutsineq pillugu inatsit pillugu politiinut nalunaarutiginnittarnerit tunngavissaqanngitsut, suulluanngippallaartut nalorninartullu pinngitsoortikkumallugit.

§ 73-imut

Aalajangersaasaq nutaajuvoq ilanngunneqarlunilu siunnersuummi aalajangersakkamik nutaamik § 33-imi ilanngussisoqarnerata kinguneranik.

Imm. 1-imut

Inatsisissamut siunnersuutip atuutsilerfissaa 1. januar 2011-mut siunnersuutigineqarpoq.

Imm. 2-mut

Maannamut Inatsisartut inatsisaata nr. 14, 5. december 2008-imeersup kommunit aqunneqarnerat pillugu inatsisip atuuttup peqatigitillugu atorunnaarsinneqarnissaa siunnersuutigineqarpoq.

Imm. 3-mut:

Aalajangersakkami aalajangerneqarpoq nalunaarutit inatsit atuuttoq naapertorlugu suliarineqartut atuutiinnassasut inatsimmi aalajangersakkat naapertorlugit allangortinneqarnissamik imaluunniit atorunnaarsinneqarnissamik tungaannut.